



08759

忠節十二

書孝軍門自殺事 鮑源深

江陰繆荃孫纂錄



咸豐己卯黔中苗患起自台拱廳當事者誤用撫賊勢益熾連陷鎮遠黃平都勻黎平各府州下游二十餘州縣賊徧擾繼雖用勦而檄調者率皆疲茶之兵無能致敵當事束手無策制軍自滇奏令滇省提督孝軍門援勦軍門帥兵二千赴黔至詢初時勦辦情事歎曰蠢爾賊何遽至是撫之實縱之耳與中丞言不合慷慨出省門向人誓曰成敗未可知若臨敵退縮中丞殺我若節敗為功中丞殺我若勦賊未盡苟且完事中外皆賊道路不通者數月軍門節節蕩掃直抵都勻城城立復入城安營居之捷書報省垣請中丞速置文武官並給餉復遺書中丞左右曰吾能復城不能守城吾去城雖復仍委於賊官來則吾軍可前進復他城幸毋緩中丞得捷書檄某知府往以病辭改委某仍如前辭不許則故遲遲其行中丞無如何而餉亦不往軍門書送至迄無應於時軍門坐困空城已逾一月欲退不可欲進不能食將盡兵飢欲譁盼官與餉終不至喟然曰何遽殺我也我死不足惜所惜者功未成纔收復一城竟畢命於此耳乃作家書遣人問道回滇安其七旬母在城朝夕以好言慰飢軍軍中皆不知萌死志也詰朝坐帳中命取火吸淡巴菝隨遣使者出口我欲少息侍者甫出帳忽聲發急趨視則以小洋鎗自戕洞胸死矣中丞聞信遣人視殮某守始來檢衣帶中有紙書字數行潦草不可辨大意鳴其自死之心中丞入奏但言餉未繼至情急自戕朝廷雖予以卹典疑其輕生而公效命之苦衷無由上達矣靈柩歸旅婦人孺子皆哭士民設祭者盈道旁蓋軍門忠勇過人眾所夙仰合省望其功之速成故無不惜其死之速是非固在人心也公而有知亦可瞑於九原矣公諱孝順字行先滿洲某旗人

論曰昔人有言死或重於泰山或輕於鴻毛公之死重耶輕耶吾無從遽定也然古今論人必審其時察其勢而進原其心處乎不能不死之時迫以不得不死之勢毅然以一死謝天下雖其死不免於激而其心固可以對君親而無愧矣而當事者或以輕生議之嗚呼公旣捐其身以死決不計其死之後議之者何如也而議之者亦曾為公思之公思

續碑傳卷六十五

何爲而死也哉

董壯節彭勤勇二公別傳 李元度

董公諱添雲字鎮銘世居平江西鄉之板岐以貧故攜弟必發走長沙
並入撫標充戰兵遂爲長沙人饒齊力能開五石弓射能命中道光二
十二年西夷犯順公從提督果勇侯楊芳出師廣東一日夷撲城有營
將在城外楊侯欲調之入火攻甚熾不能行令曰有能往者賞眾莫對
公獨應曰某願往挺矛絕城出少選兵皆入城楊侯奇公賞六品服咸
豐二年粵賊圍長沙公與弟必發從守城圍解公語人曰吾觀諸將中
惟都司塔公及千總彭公膽勇過人將才也異日必能辦賊時忠武公
塔齊布方以都司發湖南而彭勤勇公三元則以武科進士借補千總
也會塔公練標兵公隸其麾下別募寶勇五百人則以彭公將之公與
彭公深相結期殺賊自效茶陵土寇作塔公帥所部進勦命公解火藥
期三日至公踰宿即至吃曰何速也公曰遲恐有阻隔則貽誤大矣四
年三月賊陷湘潭塔公帥標兵及寶勇道州勇征之公與弟必發從時
賊踞城外民廬塔公好輕騎嘗賊覘虛實公兄弟輒隨行一日塔公策
馬率壯士數人入黃龍巷必發先驅巷狹而長甫入賊數十人突出攢

續傳卷六十五

二

矛刺塔公必發急以背受之中肩以巷狹故塔公得跳而免必發死之
越二日師大捷湘潭平公擢守備或賀之公憤然曰賊戕吾弟吾雖官
至一品弗願也但願生啖賊肉耳何賀爲遂繇湘潭轉戰至岳州公輒
先陷陣斬賊亡算擢都司再戰復武昌

詔以游擊補用 賞換花翎從克興國大治暨黃梅廣濟破賊於田家鎮

詔擢參將公長身面赤色額以下痘癍如錢目炯炯若巖下電每橫矛
陷堅陣礮彈雨下不稍卻賊見其旗輒相語曰童麻子至矣則皆走十
二月塔公進攻九江賊死拒不下乃令諸將番休進攻公帥隊薄城礮
彈穿其袍袴千總某請收隊公叱之曰若怕死耶何必從軍益前進忽
賊礮傷公胸昇歸營創甚塔公屢撫之泣公曰毋然但速攻城越七日
而卒公善撫士卒賞賜無所吝身後發其篋衣服外一無所有同營皆

哭失聲

詔贈副將

予諡壯節

賜祭葬

賞雲騎尉世職祀塔忠武專祠而平江縣城忠義祠亦設主祀公彭公諱三元字春浦善化人繇武生中鄉舉成進士歸湖南撫標試用期滿借補千總咸豐二年賊犯長沙前湖北巡撫羅公繞典奉

命幫辦防務檄公募勇丁助剿圍解以守備卽補賞藍翎三年禮部侍郎曾公國藩奉

命治團防檄寶慶守魁聯募寶勇千人赴行省而以公及寶慶協都司普承堯分將之會江西泰和土寇竄茶陵安仁公從塔齊布公往剿平之擢都司公所部遂隸塔公麾下明年從破湘潭

賞換花翎師抵巴陵又破賊於新牆於是寶勇以敢戰聞八月官軍克武漢公扼截洪山斬賊多晉游擊會塔公與羅公澤南議分兩路進攻

興國大治等屬以羅公湘軍過單命公帥所部輔之九月復興國乘勝破半壁山賊巢十月四日官軍盡焚南岸賊營明日賊連檣至公扼諸

江岸會塔羅二公至揮軍夾擊追至下游而上游賊數千舍舟登岸將乘虛襲湘軍老營公馳至擊卻之賊揚帆上駛再登岸公沿江追擊會

羅軍掩至賊大敗溺死亡算論功晉參將十一月大軍渡江攻黃梅公陣橋西扼賊衝湘軍競進賊卻公遽踰橋從柵門躍入焚其營遂復黃

續碑傳卷六十五

梅移攻孔隴驛入賊土城禽偽丞相余福勝遂同克廣濟於是大軍復南渡攻九江賊堅守不下塔公百計攻城日與賊戰相持幾一年五月

二日武昌復陷八月塔忠武公卒於軍曾公疏請以副將周鳳山接辦

浔防而以公及普承堯兩營副羅公回援武昌九月復通城進師崇陽賊夜遁會湖南防兵敗於蒲圻之羊樓崗退保岳州羅公令諸營分扼

羊樓崗遏賊上犯而獨與公及湘副中營李杏春駐崇陽時偽總制楊萬年踞梯木山分擾濠頭堡堡人乞援公與杏春帥所部進剿入山焚

其巢將回軍偽翼王石達開前隊突至公迎擊斬先鋒悍賊而大隊麤至賊鎗中公耳流血滿襟戰益力次日賊至益眾公前逆戰賊自後火

其營公勒馬回救殺賊渠一人並格殺數賊力竭墜馬遂遇害李君杏春亦死之時九月二十五日也羅公復戰而捷卒克武昌成大功而公不及見矣

詔贈公副將

賜祭葬

予諡勤勇

賞世職祀塔塔公祠公忠勇識大體一子瑾光從軍濠頭堡之戰詔言

理光陣亡左右以告公急止之曰速擊賊毋以吾子沮士氣督戰益急
殉節之日將出隊馬忽踉蹌三上三墜眾以為不祥止之公不可易馬
而出先是有

旨命曾公舉堪勝總兵之員曾公以公及楊公載福應
詔會公殉難不果擢瑾光以功保藍翎守備中武科舉人旋以疾卒於
家

贊曰軍興已來知兵者首塔忠武公而為之爪牙腹心者童彭二公其
最也忠武齎志沒兩公先後死綏皆不竟其績天之厄之甚矣哉然自
諸公倡勇敢雖婦孺曉然知賊之可滅其卒成大功皆諸公風聲所起
抑皆其同袍澤者所為也其與忠武公廟食千載宜矣

道光咸豐之際粵賊亂起各省皆倚制兵討賊後乃稍稍招募方楚軍
之未興也戰武宣桂林戰湖南戰金陵黔軍最著而全總戎尤以勇聞
於時總戎名玉貴鎮遠人少落拓不偶初入營伍補名糧無所表見意
頗不自聊及徵兵令下從征粵西乃稍喜每戰輒衣白襦褶以自標異
驍果軼羣都統烏蘭泰公一見大奇之使募健兒三百人別為一營而

續碑傳卷六十五 四

是時湖北人田學韜者亦以勇名與玉貴埒烏公擢為左右翼凡戰皆
此兩人先登為賊所指目及烏公戰歿桂林學韜亦前死玉貴從他軍
至道州賊酋楊秀清擁眾奄至大將某棄營走營內金韜山積玉貴不
忍棄謀督護而計未有出賊已迫近卽挺身單騎橫矛立橋上厲聲謾
罵且曰吾一人耳汝敢來鬪否秀清初起持重又未知大將已去惶視
良久謂其下曰此白袍將吾聞名舊矣今觀其氣盛言壯必有伏不可
墜其術中竟退玉貴飛報主者徐引還閱營無恙軍中莫不服其勇也
總督徐廣縉為繪圖呈奏錄首功白袍將以此名聞天下時以比唐薛
仁貴云後隨向忠武攻金陵提督和春前在廣西湖南親見玉貴戰狀
及是赴援廬州絕欲得玉貴自助咨向調往遂以副將署壽春鎮總兵
玉貴既至相度廬州城外有平地可以立營而前後皆賊屯玉貴念非
出奇不能取勝引兵直入其閒置壘令日以半軍築以半軍護士皆注
鎗持滿賊錯愕來爭且戰且築壘立成晝夜疾擊刻平十餘壘賊幾盡
突會攻城為礮子所傷數月不愈卒廬人惜之私立祠以祀或曰賊酋
陳玉成疾玉貴甚使人於當道掘阮與戰祥北以誘之玉貴墜阮死余
至江南欲問其事而竟無知者

盧江吳小軒為言咸豐六年三河賊營之破也實陳鎮軍智泉之功先是賊於三年破廬州四年入廬江就三河市鎮砌石城而外築數營以據要害五年冬廬州民內應官兵復廬州六年提督和春統兵攻三河久不下公曰賊之不得破也以我立營避其衝使賊糧餉救援往來不絕是自困也遂單騎周視營基次日親執大旆率兵勇千人於賊壘之間立一營以塞其監賊懼發大礮對旆轟擊公伏馬上手執大旆不動兵士見公旆植立人伏馬上以為避礮也且戰且築不息須臾營成始知公中礮死矣旆猶在手握甚固賊糧道斷救援不通數日大敗潰事聞

賜卹諡節愍人皆知公忠而不知公之功也公某邑人卒年未三十雄勇有智略初逆賊楊秀清之作亂也公與張家祥俱被脅從後皆自拔投官軍積戰功保至湖南岳州城守營參將洵擢至總兵官家祥即世所推名將張國樑者也公性至孝其父嘗與之書曰汝初陷賊而後從

皇上不殺汝而用汝不數年而官高如此若不以死報

續傳卷六十五 五

國非吾子也公執是書以泣故卒殉

國難小軒吾友蘭軒徵君子以徵君起義師殉節世襲雲騎尉有至性

周節愍公別傳 李元虞

周公諱雲耀字光庭邵陽人少有膽略充實慶協馬兵道光十二年從

征江華逆獠趙金龍補外委案擢千總二十七年勦新甯賊雷再浩有

功賞藍翎擢嶺東營守備時承平日久營伍廢弛以游手充尺籍值征調

輒相向泣公力挽其敝汰羸弱勤訓練與士卒同休戚踰年新甯賊李

沅發倡亂莠民蠹起應之公帥所部兵百五十人團結鄉兵與俱守界

賊來犯擊走之咸豐二年逆渠洪秀全下竄陷江華公屯軍牛塘等處

與賊戰屢捷三年夏粵寇鍾爾康犯江華公帥二百人迎勦大敗賊慮

賊由間道襲嶺東乃冒雨夜馳歸翼日賊果大至出不意敗之禽逆酋

彭如海當是時侍郎曾公方治團練駐長沙聞捷手書批牘云此次用

兵若神鷹盤空飛疾而力勁不愧西南鎮鎗也四年擢江華營游擊地

接粵西賊黨出沒無虛日公以兵法部勒鄉人使家自為戰會粵寇劉

紅貴犯濤墟公率所部往勦之賊敗遁別賊羅亞會犯嶺東界擊走之

追及粵境緒其巢賊竄永明之桃川方擬躡勦忽報別賊來自灌陽圍攻道州甚棘公聞王公龔帥湘勇來援急率兵會勦圍立解賊偵知公遠出策江華必虛將襲城公卽夕循閒道歸遲明果與賊遇奮擊敗之遂進攻桃川賊聞風遁追及粵境之栗平街戮賊殆盡公自與王公合軍兩人深相得士氣百倍官民倚此兩人爲固婦孺皆知其名粵賊甚畏之未幾援甯遠援錦田往輒有功十一月賊犯零陵公迎擊於青口板橋追至梅崗賊敗遁巡撫駱公上其績

詔賞孔雀翎擢參將五年春勦賊於錦田於富川於永明灌陽均大捷夏四月粵酋朱洪英陷東安公會諸軍圍勦克之敘功晉副將尋追賊道州大破之賊回竄圍廣西之全州公力疾馳援全州圍解又被賊於興安時軍威震甚賊當之輒靡恨公次骨然公所部裁七百人又數出境援勦馳驅勞乏賊滋欲困公遂繇灌陽山竄永明矣永明屢被賊城中死徙一空至是告急公兼程回援中途糧盡貸米於民家民間公軍至轍已炊而餉之以十一月朔夜三鼓抵城下犂且賊大至倉猝戴草冠韉刀出城擊賊所殺傷相當旋以眾寡不敵斂兵固守賊訶知城中糧少兵乏悉眾仰攻期必拔公以忠義激厲兵身受數創仍晝夜登陴督戰賊攻益急而王公方勦他賊遠不及來援城中勢益孤十二月初四日城陷公北向叩首曰臣以死報國矣手刃三賊乃自刎同死者守備銜千總朱耀永明汛把總周佑外委官獻爵事聞照副將陣亡例

賜卹

子諡節愍

敕祀昭忠祠耀佑獻爵等皆

賜卹如例

論曰軍興以來楚勇湘勇淮勇名天下營兵不與焉湖南綠旗營將能戰者塔忠武外惟公耳有公及塔公爲之將則兵率以敢戰聞夫豈不以其人哉然則謂兵必不如勇者皆目論也然公旣以將略顯而所部纔數百人卒被困以死用公者曷嘗盡其才也噫

蕭節愍周貞愍公別傳

李元度

蕭公諱捷三字敏南武陵人武生舉道光丁酉鄉試官湘陰汛千總咸豐二年以守省城功遷守備四年賊陷湘陰坐免曾文正奇其才檄領水師以功復職

賞藍翎補承綬營守備進攻武昌時水師分兩隊公率戰艦為前部昌礮兩進先駛至鸚鵡洲擲火球焚沿江賊柵後隊繼之賊不支揚帆下遁又急駛出賊前燔其輜重城賊喪膽八月二十二日渡江攻漢陽朝宗門外土城楊公載福時方為游擊公隨之血戰見賊舟輒焚漢口以內船皆盡會陸軍破花園賊壘賊散北門走武昌復晉都司

賞換花翎時餘賊向據襄河水師扼新灘口二十四日賊駕裝編浮襄河下大小千餘艘水師迎擊敗之源流追及上游有悍賊數舟用火彈撲營火灼公頭面手足幾死公裹創力戰追剿二十餘里尋敗賊蘄州釣魚臺骨簞磯等處遂大破田家鎮過九江直趨湖口初江西吳城戰艦數百淪於賊賊實砂石沈諸湖口截江路僅留隘口通舟阻以竹纜而於對岸梅家洲築偽城環列巨礮數百以拒官軍值水涸弗利仰攻

十二月八日公駕火舟徑衝賊柵礮轟發如雷當者輒碎燔賊舟百數遂乘勝駛入內湖泊大孤塘十二日游擊孫昌國黃翼升等簡輕舫二十精卒二千自大孤塘至平峰出賊不意焚內湖逆舟二百有奇賊遂囊土塞湖口水益涸師弗克歸二十五夜賊用小艇雜外江巨艦中潛縱火水師驚潰輜重皆被燬曾文正大營泊九江北岸亦被焚襲於是

續傳卷六十五

公等阻郡湖內外隔絕水師改有船供食宿自陷入湖內眾皆露處風雨中公等激以忠義軍心彌固五年曾文正入江西益治水軍公晉游擊四月乘霧襲賊雞公湖敗之遂復都昌五月賊由大孤塘上犯勢勁甚公逆擊之於青山決死戰賊大敗人舟俱燬遂奪回前贖所失帥船及賊魁據鐘巨艦七月十四日復敗賊青山當是時文正屯南康檄平江營陸軍渡湖約水師夾攻湖口二十三日平江軍攻克湖口城賊退保石鐘山堅壘時北風勁浪立如山公率十七舟猛進遙見陸軍圍石鐘氣益奮手自揮旗已衝越賊艘將上下夾擊而下鐘山及梅家洲賊壘林立礮齊發公中飛礮死之諸將憤極併力攻盡焚下鐘山逆舟追三十里始還事聞

贈副將

賜祭葬

子益節愍

賞世職入祀京師昭忠祠咸豐七年九月官軍克湖口九年曾文正再出視師彭公玉麟建水師昭忠祠於石鐘山曾公疏請列祀典首祀公及周貞愍公

貞愍諱清元字玉泉湘陰人也世業農兒時與羣兒角戲於牧場立表數十步外飛石命中掘溝尋文跳越之能往復十次羣兒皆出其下同里左明志者以拳勇鳴於鄉招致門下傳以技嘗言天下幸無事有事則周清元暨吾子光培皆驍將也咸豐二年冬賊自益陽竄臨資口公混迹市人中默識其軍卒舟艦糧械之數聞提督向公榮尾追至八字哨相距三十里公遮道見向公曰廣西能戰賊不過三千餘人餘皆裹脅耳臨資口四面阻水湘包其東南資繞其西北數十里平原渺無障蔽賊所擄民船笨重不易行一炬可盡也請以兵扼要路使不得偷渡賊糧盡旬日當餓死何怯而不爲向不省公固以請向叱之退繞道樟樹港至湘陰賊從容駛去矣及東南糜爛公太息曰賊自走絕地向公縱之去能辭厥咎耶三年曾文正募水軍公謂光培曰時至矣丈夫當努力殺賊報

國毋徒死牖下爲也遂同應募隸千總楊公載福戲下楊公嘗爲湘陰汛外委夙才公而蕭節愍官湘陰千總時亦知公驍勇及戰必與俱四年賊踞湘潭楊公及彭公玉麟等帥水師進剿時賊掠民船數千旗幟蔽兩岸我水軍本新募又經岳州新控望之多奪氣公言於介眾曰民

嶺碑傳卷六十五

船不能戰一炬可盡也何懼焉遂隨楊公猛擊逼賊巨艦賊倉卒以瓷盃來擲公手接而回擲之中賊渠楊公躍登賊舟公隨簪身入用火球分擲左右舟時風烈火大熾賊爭赴水死從軍見火起急槳爭進分途縱火燬賊船皆盡以功拔充哨官隨攻克岳州嘉魚各郡縣八月二十三日攻克武漢受重創力疾進剿戰斬黃田家鎮皆有功五年武昌再陷公隨彭公回援駐金口扼上游每戰必先不受創不止六年胡文忠督攻武昌經歲不下議先斷糧路困賊乃檄水師清江面賊船公時典水師副後營率先下駛越武漢二城直駐沙口賊數來犯皆敗之駐沙口八閱月賊糧斷城賊乃困十一月二十二日公繇沙口帥師上擊先破賊浮橋斷其鐵練大戰黃鶴樓下公被礮傷力戰不退各營繼之遂克武昌十二月六日以創重卒於軍年二十有六公繇藍翎外委淳保參將加副將銜

賞驍勇巴圖魯名號並換花翎洎死事

詔貶副將例議卹

子諡貞愍

賜祭葬

賞世襲騎都尉祀京師昭忠祠公勇而廉所得月俸半以充犒賞既卒不名一錢所部贖金送之還葬而左君光培戰績與公埒後官至總兵贊曰當節愍攻湖口時典平江軍者元度也既拔城進擣石鐘山壘登高望水師礮聲雷震煙蔽空日暮始罷戰不知公已死綏也公與周貞愍齊名昭忠祠祀死事將卒三千餘人二公爲之冠烏虜壯哉余嘗往來金陵泊石鐘絕壁下夜半風怒號萬竅齊鳴與所謂鐘磬噌吰聲相響答豈諸公忠魂爲之耶拜其祠益欷歔不忍去云

王剛介公傳

陳繼聰

王公國才字錦堂雲南人以材武入戎籍官至普洱營游擊咸豐三年冬與署龍陵營參將佟攀梅奉兩湖總督吳文節公檄調征湖北公帶土練三百自隨行次荊州將軍官文恭公一見偉之奏留軍前差遣明年四月賊陷安陸進犯荊州官將軍使公督兵一千二百人並江陵練勇五百人爲先驅守城北龍會橋賊萬餘猝至我軍望之有畏色公拔劍奮曰今賊如潮湧不進何處求生活親熱火鎗殪其執旗賊目一人卽挺矛入賊陣大呼兵勇曰退一步者斬於是佐領玉貴揮眾直前醜徒披靡皆擁擠墜河死餘賊在樂壤橋浩子口者亦爲副都統貴陞與

續傳卷六十五

九

佟攀梅所敗荊州獲安官將軍奏公功第一擢授副將是時監利石首宜昌諸邑尙爲賊踞五月公赴宜昌勦之賊遁往洞庭湖他邑亦爲別將收復會武昌失守官將軍遣軍往勦六月克沔陽七月克天門八月荊州軍會長沙軍攻克武昌漢陽公皆預其役旋隨總督楊需下勦黃州九江五年正月總督兵敗於荆竹鋪漢陽再失三月進陷武昌其日公自潯陽赴援三更方抵鄂城尙不知城之已陷也呼門而入賊亦不知爲官兵直至蛇山之前賊始驚疑殺聲互起天將明矣賊聚益眾公因孤軍深入不敢戀戰乃由南門整隊而出結營城外旣而由沌口出新灘同水師參將鮑超王明山分隊會勦焚賊船百餘艘我兵進屯大軍山公尋從湖北巡撫胡文忠公攻漢陽率軍力戰盡毀白沙洲百步街賊寨六年冬克其城以功升安義鎮總兵仍赴九江勦賊明年二月將軍都興阿從黃梅知縣覃瀚元之計以空城誘賊入使公駐桂家畝爲後拒賊果自二郎河廬至遂與副都統多隆阿合力殲之進攻小池口破段窰楓樹礮諸壘五月安慶賊以九江事急遣黨竄湖北犯蘄黃公偕提督楊岳斌率師往援賊悉銳踞童司牌六月二十四日公移營屯濯菴是夜賊潛來犯公方督兵禦之適賊礮中我營火藥燄四起公

恐軍心紛亂屹立不動而火勢愈烈公亡於陣候補湖北縣丞張兆麟
候補湖南訓導吳炳從九銜吳灼亦受傷死公自滇南來楚剿賊數年
臨敵身先士卒大小數百戰所向有功平日廉明愛士甚得兵心所部
至五千人赫然負將帥之望而卒殉
王事以死胡文忠深歎惜之疏聞於

朝
詔照提督例賜卹

子諡剛介

論曰賊犯荊州也其鋒甚銳非公力戰荆襄危而中原震動寇禍益難
收拾矣故龍會之役公之功不止保全楚疆也至夜入武昌城以孤軍
入虎穴奇勇亦屬罕有宜其威名赫然爲一時所豔稱哉

畢君殉難碑記曾國藩

自楚軍之興忠武公塔齊布實始以勇名天下楚人剽悍者率低首塔
公亦豔稱雲南畢君塔公每臨敵負鎗挾弓矢又令二卒樹長矛執曳
馬繩竿以從其爲器也四畢君每臨敵負鎗腰五十矢又令卒手蛇矛
持八尺刀以從其爲器也亦四塔公躍馬驅馳噴人追從從軌返鞭之

續碑傳卷六十五

畢君怒馬直穿賊陣戒後者無得妄從我人亦自不敢從也畢君名金
科字應侯雲南臨沉人以征開化苗匪功敘藍翎外委署臨沉鎮標外
委咸豐四年隨副將王國才赴湖北軍營破賊於天門丁司橋累敘至
花翎都司十一月國藩檄令隨塔公攻圍九江明年正月賊犯武昌王
國才回軍援鄂畢君遂爲塔公所留其後塔公物故畢以驍勇冠潯軍
逆酋石達開之寇江西也連陷瑞州臨江等七府數十州縣畢君所至
常陷陣克捷旋爲他部牽率失利終不得獨錄其功自九江奉檄而南
以五年十二月破賊於樟樹鎮明年二月軍敗失之自南昌而東以六
年五月破賊於饒州之章田渡六月郡城陷失之畢君自痛爲他部所
累益發憤募死士再入饒州誓眾曰今日上岸破賊不捷吾不復歸舟
矣一鼓克復府城饒之耆黎婦孺見聞者與不見聞者皆曰畢君功也
由是

賞加呼爾察巴圖魯名號補臨沉鎮都司升用游擊名譽大振而忌君
者日以次骨飛謀薦謗迭相汙染君提千餘人當四戰之地索餉不至
又惡忌者出己上中夜鬱鬱不自得嘗思立奇功以自旌異會微池之
賊大至歲暮士有飢色有司者責君能破景德鎮軍食可圖也君以正

月二日出師初四日驟攻景德鎮入市乃無一賊別擊十人搜勦後街賊峰起從卒亡七人傷三人君縱橫擊刺踐血而出最後賊以噴筒環攻君於王家洲隕焉年二十五歲耳閱十有八日前從傷卒三人者收得遺尸又三載咸豐九年子弟國荃破賊景德鎮憑弔畢君殉難之所而壯士則既死矣功名之際有天有人在己者獨足恃乎哉於是伐石以表遺蹟聲之銘語俾行路歌之以永饒人之思銘曰

橫目蚩蚩同出一治眾雌無雄誰是健者塔公首出次乃畢君軀幹雖小陳安之倫匹馬斫陣萬夫莫當人心之賊一矢或傷內長媚嫉外逼強寇進退靡依忍尤叢詬鬱極思伸矯首砥天徒飛無翼或墜於淵淵則有底憤則無已萬代千齡哀此壯士

畢剛毅公傳 陳繼聰

畢公金科字應侯雲南臨沉人少入戎伍材武絕人以征開化苗匪功敘藍翎外委咸豐四年從普洱營游擊王國才調赴湖北四月賊窺荆州將軍官文恭公使王國才拒賊於龍會橋大戰勝之公亦燒斃橋北伏賊甚多復破之於天門丁司橋累敘至花翎都司十一月奉侍郎曾公檄隨提督塔忠武公攻圍九江五年正月賊犯武昌王國才回軍援

鄂公爲塔公所留七月塔公卒公仍在潯營時逆酋石達開歷陷江西

郡邑勢張甚公每出戰常陷陣驍勇冠潯軍然往往爲別將牽率失利終不得獨錄其功十二月自九江奉檄而南破賊於樟樹鎮六年二月軍敗失之五月復自南昌而東破賊於饒州之章田渡六月饒城陷又失之公痛他部之累已益發憤出已貲募死士十一月奉曾公檄再至饒州謂都司林保曰吾以一千人防饒聞賊從建德東流來者五六千人又探報李邱二賊目自率三四路悍賊與之合統計近萬人此豈可力敵者非出奇不能制勝乃使營官翼廷貴領兵五百潛伏陶溪渡爲疑兵誠曰如官軍追賊至則出擊之復分翼迎敵以岳炳榮將右出其前朱洪章將左繞其後部署既定公慷慨誓眾曰今日上岸破賊不捷吾不歸舟矣旣而前隊遇賊伴爲少卻賊追之後隊橫出截爲兩公督壯士居中縱馬衝突當者披靡麤戰至渡伏兵起賊猝遇之驚遙望林中又旗幟徧滿以爲官兵大至相率逃竄公乘勢圍殺遂克復饒城天子嘉之賞加呼爾察巴圖魯名號補臨沉鎮都司以游擊升用而軍中忌公者以公名譽大振愈銜之次骨蜚語騰謗索餉輒不至公憤鬱不自聊思更立奇功以報

兵去某亦冒賊圍出獨兆熊爲死守計大開營門放空鎗警賊賊意我營火藥且盡爭出兆熊乃安置鎗礮度賊兵將近突然施放殺賊甚眾無何賊漸逼兆熊謂其士卒曰若等去我乎抑從我乎士卒皆哭曰願從大人兆熊於是令營內四面皆置火藥徧滿冠服俟無何賊眾前來禽兆熊兆熊撲案罵而營內火已作兆熊及士卒等俱焚燒死兆熊守破岡子爲四月某日閱數日而死於難嗚乎其可悲也歟當是時高資暨九華山大營相繼失陷賊遂竄丹徒鎮因兆熊與相持得遲數日至丹徒提督張國樑援兵至賊敗退去而丹徒鎮獲全識者以爲兆熊守破岡子功焉

鄧忠武瞿威壯公別傳 李元度

鄧公諱紹良字臣若乾州廳人父士儼以歲貢官平江訓導有學行公幼入伍補新場堡屯把總道光末從征崇陽以功擢屯千總晉守備尋從征廣東

賞藍翎李沅發反新甯公帥五百人敗之窮追至黔粵斬獲甚眾明年沅發就禽公擢提標都司
總傳卷六十五

諸索潭及陶鄧墟賊竄潯州踞大黃江公麾軍渡方對壘別賊自牛排嶺來犯公引精騎五百橫衝其陣張左右翼繼之兩路賊皆敗又敗賊於象州乘勝抵永安戰皆捷遷游擊二年賊犯桂林公空壁躡之一日夜走三百里屯西城圍解授楚雄協副將賊竄湖南公奉檄守甯遠旋守衡州賊繇間道走長沙公帥師馳援與承級協副將瞿威壯騰龍壁南城外焚賊踞民廬敗賊阿彌嶺會賊鑿隧道隱隱聞鋤鑿聲巡撫張公亮基檄公及糧公帥勁卒八百人入城備緩急九月二十九日魁星樓側地雷發城裂十數丈賊蜂擁上公帥敢死士躍而前礮彈洞右臂血淋漓不少卻塵鬪移時殲先登悍賊百餘督兵索土城復完未幾賊解圍竄岳州直趨武昌公卷甲尾追三年擢壽春鎮總兵晉江南提督攻鎮江會援賊大至我軍不滿千敗潰

詔奪職仍協勦金陵尋以五百人援東壩克之轉戰至太平又遮敗之於采石移防甯國敗蕪湖賊於黃池追奔二十里斬馘近萬五年春詔賞三品服及花翎帥師援徽州進攻婺源克之尋赴江甯鎮壽沿江賊巢賊走石埭負峒羊棧嶺險絕仰攻多不利公遣將循別徑登嶺赭其巢賊越山而竄夥石埭以次復會蕪湖賊麇集老鴉山甯國告急

公移師攻之三戰三捷賊望其旗幟輒反走遂復蕪湖沿江賊壘皆平授陝西提督六年春奉

詔攻揚州冒雨渡江師精銳薄城環攻六晝夜奮身先登攀堞而墜者數誓必拔卒引軍上克之

詔調浙江提督幫辦皖南軍務戰三汊河拔其柵適甯國陷倍道進攻敗賊於雙橋趙村東溪橋等處進次望牛墩大小數十戰皆捷又敗賊於夏家渡於團山分兵平涇縣各村賊巢援賊至敗之於桃花園麒麟山遂克甯國伏屍百餘里七年復南陵會蕪湖賊犯灣沚公痛勦之夏四月金陵賊大至復犯黃池灣沚分黨從紅楊樹內竄公擊走之四次攻蕪湖皆捷遂進攻繁昌敗賊孤山壩又敗之清水河又敗蕪湖賊於四合山適青陽賊窺涇縣分兵擊卻之賊復走據南陵當是時公以甯國爲浙藩籬而涇尤皖南咽喉自提兵遏其衝相持至兩年賊死爭不能入尺寸會丁母憂乞解官奔喪

詔改爲樞提督仍督辦軍務未幾復南陵時別將攻瓜洲急賊謀解圍乃犯南陵涇公皆擊敗之尋破三里店賊巢南陵涇皆平八年江甯賊糾捻匪來犯黃池灣沚連屯四十里公自南陵回援力戰走之賊復犯

續傳卷六十五

十四

南陵勢尤悍公與總兵周天受前後夾擊大破賊進攻桃木段賊巢破之追至孤山壩盡焚其壘繇是石硤施家渡要隘皆奪回尋遣將平太平卓村賊巢遂進攻荃橋適賊復犯黃池乃分兵擊卻之蕪湖賊同時來犯亦爲公所敗然公所部萬六千人多分防各屬要隘灣沚大營勢甚孤而賊眾數倍盡踞河北三里埂和尚橋等處分番出犯而甯防危矣公飛檄請援時軍餉久絀孤山壩各營相繼失守十一月初七日總兵戴文英以金陵援師至賊用大隊襲其後文英戰死援師潰營中食盡賊攻益急公知勢不可支具衣冠北面再拜舉火自焚其營死年五十有八公死而浙遂不能支矣

詔贈太子少保

賜祭葬

子諡忠武

賞騎都尉兼一雲騎尉世職

救甯國及本籍各建專祠

賞其父士儼白金四百兩時父年八十有七矣同治元年

詔南撫遣官

賜祭一壇

瞿公騰龍字在田先世居陽湖曾祖明誠任永定縣尉僑湖南遂爲善化人年十九入提標繇常德協外委洊擢郴州汛千總道光十二年從征逆裔趙金龍以功

賞藍翎再征廣東八牌猪

賞五品服遷鎮守備乾州苗變帥師燔其巢

賞換花翎遷古丈坪都司署鎮守游擊咸豐元年出師廣西屯武宣疊敗賊於桐木馬鞍山時患瘧力疾決戰上官勸少息公不可曰賊勢如此某敢愛身耶賊竄永安追剿至古排塘屢斬賊目焚其巢擢參將二年賊自永安犯桂林公繞道出賊前壁文昌門賊用黨牌呂公車來攻公力戰禦卻之圍解擢永綬協副將

賜號莽阿巴圖魯亡何賊犯長沙公馳援與鄧忠武同奉檄帥勁卒爲游兵備非常賊用地雷法轟城初爲鄧公所禦十月十八夜五鼓魁星樓側地雷復發城再裂十餘丈公力堵斬悍賊三百有奇城復完明日圍解

詔加總兵銜公綏岳州追賊至武昌三年擢鄖陽鎮總兵進剿江甯亡

何賊北犯

續碑傳卷六十五

五

詔公帥師二千人赴河南山東防禦抵高郵欽差大臣琦善疏留之會總兵雙來中礮死遂兼統雙營並總理營務充翼長時瓜洲賊悉銳援揚州公所部皆分防要隘戲下裁五百人公誓眾曰賊十倍我不力戰勢且盡今當有進無退敢回顧者斬遂下馬持大刀督陣五百人皆奮勇衝殺呼聲震天五盪五決賊敗潰夜雷雨大作我軍乘電光冒雨衝擊賊不辨眾寡遂大亂自相砍殺厥明賊退屍骸枕藉計斃賊二千有奇越數日瓜洲賊由三汊河揚帆至登東岸聲言復仇公帥眾渡河橫截之賊敗走十一月克揚州並復儀徵四年二月公進剿瓜洲破其伏賊連敗之初五日公督師深入賊傾巢出拒復分黨襲我軍後公被圍血戰竟日手刃十數賊力竭死之年六十有四事聞

贈提督

賜祭葬

子諡威壯

賞世職入祀京師昭忠祠子輔廷候選從九品廣善藍翎從九品廷能藍翎外委廷豹藍翎把總有

旨並賞守備廣善尋改文職累保布政司經歷加知州銜咸豐八年戰死於乍浦廷豹隸都統德興阿戲下充營官八年賊犯浦口力戰死事並從優

賜卹如例

贊曰自賊起嶺西長驅而東穴有江左獨賴吾湖南選將才下水陸軍輸糧糗用能乘機逐利收故所失地以汜王誅然當前犯長沙時穴火發賊呼謀乘城非得二公奮身各蔽陷處抵擊之城其危矣無湖南是無天下也然則保一隅遂全天下二公之功偉矣哉光緒元年

敕建駱文忠潘忠毅張撫部三公祠於長沙以二公配食諸死事者附

祀益旌城守之績云

鄧忠武公墓表 楊彝珍

公諱紹良字臣若湖南乾州廳人父士儼歲貢生任平江訓導行誼稱一時公自幼以武力智略自許請於父充屯丁補新場堡屯把總道光二十二年從征崇陽以先登功補同全坡屯千總尋署花園守備適李沅發爲亂新甯公帥五百人追賊深沖洞賊率銳逆戰公仗戈直前所部從之賊辟易遁上思村橫據金峰嶺諸險監公命將士乘晦銜枚登

續神傳卷六十五

七

山噪而馳賊驚潰不知所爲蹂踐死者無算生禽李沅發檻送京師

賞揚勇巴圖魯勇號並

子花翎補提標都司咸豐元年粵賊洪秀全起金田屢敗官軍提督向公檄公往與爲犄角連敗賊索潭陶鄧虛賊大岬轉竄潯州踞大黃江公麾兵渡對賊壘而軍別賊數萬自牛排嶺來會公引精騎五百衝其陣張左右翼繼之兩路賊皆敗咸豐元年夏公躡賊至象州之謝官村賊巢環左右皆山公選壯騎奮而上搏擊菁谷中奪其隘破走之乘勝追至永安州又敗之驢頭背論功擢游擊隨遷參將再遷雲南楚雄協副將二年春賊由大洞竄桂林公空壁追躡一日夜馳三百里屯西城賊百道攻城不下解圍去遂入楚踞道州諸路賊俱響應勢大振連陷江華甯遠嘉禾桂陽至郴州入其郭據之公追及與諸軍壁其三門相持月餘賊乃逸由永興徑犯長沙據城西南隅民舍爲窟穴日鑿隧道達城下隱隱有聲巡撫張公急檄公入城往來策應九月二十九日魁星樓側地雷發城圯數丈煙土漲及天賊蜂擁緣陴上公率敢死士躍而前礮洞右肩血淋漓不少卻與賊搏戰移時燈先登悍賊數人餘羣氣散走督兵累土城復完賊知城堅不可下率全隊渡湘而西陷岳州

直趨武昌公卷甲疾馳尾賊並討巴陵土賊悉平之三年春奉
旨授江南壽春鎮總兵隨晉江南提督赴鎮江勦賊賊援至公兵不滿
千環顧無後應遂奔

詔褫職仍

命助攻金陵公率所部由雨花臺直薄神策門斬獲甚眾尋馳援東壩
策單騎直擣敵營瞋目大呼賊眾潰亂遂克之嗣駐軍黃池賊引眾自
蕪湖奄至公及其未定掩擊之斬馘累萬追奔二十里

詔給三品官服
賞還花翎

命赴徽州援至則先攻休甯賊敗竄石埭之羊棧嶺高而險師仰攻
不利公遣卒由捷徑登嶺襲之焚其巢遂復石埭以次復婺源復黟縣
復蕪湖

上嘉其功

賞還提督銜六年春

詔援揚州冒雨渡江率精銳薄城環攻六晝夜奮身先登及堞而墜者
數四誓必拔卒上克之

續碑傳卷六十五

七

詔授浙江提督督辦皖南軍務攻賊三汊河拔其柵會甯國陷於賊卽
倍道往援先部兵駐金珂橋扼賊旁竄大敗之東溪橋進次望牛墩毒
其汲道賊以數千來挑戰公堅壁不出俟近逼外壕乃縱擊之斬悍賊
數百復潛師襲取七里崗遂薄城下毀羊馬牆賊不支棄城走旋分兵
勦妙葛山一帶逸賊斬數千級賊屍徧野公念甯國爲浙藩籬而灣沚
尤爲咽喉遂併力於茲且防且勦以其閒分師援蕪湖復南陵攻繁昌
皆捷賊卒不得逞八年春賊糾捻寇數萬復距黃池公亟馳往出賊不
意大破其眾又敗之蒲塘夏村閒至十月賊復犯黃池皆鴉山南分三
道來攻公亦分三道抗之賊大披靡追賊之施家渡會浙事急先後分
兵赴援賊乘虛突襲我橋石桅不守灣沚背腹受敵援師至自金陵者
一戰而潰賊騎四面陵騰之公具衣冠北面再拜舉火自焚其營死而
浙遂不能支矣公薨時年五十有八

上聞震悼

追贈太子少保

賜祭葬

子諡忠武令建專祠給騎都尉兼一雲騎尉世職敘其子亨先光祿寺

署正同治元年

御賜祭一壇嗚呼自賊起粵西長驅而東穴有江左獨賴吾湖南下水軍輸糧糗餼舳艫衝於江千里相望不絕用能乘機逐利收奪失土以成王誅克夷大難然當前嬰城時穴火發賊呼噪乘城非公奮身獨破陷處抵擊之城其危矣守一隅遂全天下公之功其偉矣哉雖不幸齎志以殞未獲躬成大勳享有茅土比荷社稷之靈諸干城之力削平僭亂邦用清彝公亦可以無憾哉予久欲為公傳因未得其狀不果為適楊海琴巡道狀公行事代其子乞表墓乃為之論次俾揭於其墓之原

虎忠壯公傳

陳繼聯

虎公坤元字子厚四川成都人祖某官副將父嵩林官湖北宜昌鎮總兵公幼而權奇倜儻父命之學輒私於塾中習技戲或以兵法部伍羣兒羣兒憚焉年十三從其父適京師途見惡少輩窘人於市心不平與之鬪惡少傷幾死眾大呼共禽公械送步軍統領有識公者計脫之得免又好博常輸千金立盡父痛懲之而不能止同里總兵馬龍謂其父曰此子不凡奈何以繩墨求之今天下方多事盍姑令較學而入伍籍乎父從之咸豐元年以小校從征粵西隸總兵劉長清軍營長清奇之

續碑傳卷六十五

大

以為功名當出己上數使之戰有功遷至都司三年賊踞金陵從大帥向忠武公勦賊江南既而公父奉檄圍上海攻鎮江皆隨行勇冠一軍父嘗被圍九華山公聞之往救力戰而入竟掖父出重圍未幾又敗蕪湖賊於灣沚尋同諸將克取蕪湖六年三月賊陷甯國趨廣德浙西震驚公以五百人遇賊數千於宣城之西林橋再戰再捷賊始斂戰不敢出浙境以安洊升參將六月向忠武公自孝陵衛退屯丹陽賊首陳玉成率眾追至勢甚張公同游擊張玉良出戰先攻五里牌賊寨燒之復渡河至黃莊橋破其礮臺賊乃竄犯金壇張忠武公遣公往援圍立解加副將銜八月會諸將攻東壩東壩為蘇常門戶賊以全力拒守官軍屢勦之不能勝公至輒先登連被數創石碎其冠不少怯遂克其巢進圍溧水七年五月溧水下復克句容九月大軍會勦鎮江金陵逆遣賊至下蜀街來援凡四次公由句容馳赴迎擊亦四敗之鎮江賊援絕糧盡十一月十二日克之公功第一擢授直隸通永鎮總兵官時公父亦以總兵立功同受

恩賞給巴圖魯勇號軍中榮之公年少名尤著稱者咸以小虎別之云明年春破湖熟鎮賊壘進攻秣陵關其地離金陵六十里賊據之互相

呼應以爲犄角公率兵四千人與之戰兩月未下因建議云賊守甚堅
浪戰恐損士卒無益不若移營逼近其穴以示不兩立之勢圍既合可
連出兵攻之察地形賊惟一路可達我軍醜徒雖眾無所用破之甚易
耳不然春水方生溝渠皆滿賊引以自固限隔官軍則攻之難當數倍
議上主者尙未及行而賊驟驅眾出鬪公擊敗之手搥大旗獨追賊十
餘里不止從者祇有游擊劉萬海及一卒萬海疑有伏勸弗窮追公笑
曰汝何今者官高而身重也萬海適新授是職故謂及之萬海不敢復
言乃從之進至石橋伏起公中鎗腦裂而死萬海與卒奪其尸歸張忠
武公撫之慟哭事聞

詔以提督例賜卹

予諡忠壯公面頰而長身短小能平地躍起丈餘善爲左右射常被創
斷其巨指然猶能執筆作徑寸書着勁有骨其所書大虎字人爭求之
謂可辟邪自貴顯後深悔少時不肯竟學而性絕穎悟覽史傳通大義
省視文牘數行俱下最嗜馬每曰行文莫如筆用武莫如馬故所蓄之
馬獨雄於諸軍又喜養健兒多以私財給之臨陣鮮衣怒馬自成一隊
衝鋒陷陣所嚮辟易其在軍不甚設警備士樂其寬有功者立賞犯法

續傳卷六十五

九

必不宥暇輒好爲軍中戲戰則踴躍奮迅而起如小兒之樂嬉遊者又
或攜酒食對賊壘飲啖誰呼叫號與賊相詈罵賊懾其氣卒不敢出待
人量極寬宏官都司時同鄉某弁以私憾於半夜從帳中刺之不中公
知之人皆以爲必復其怨公曰我豈有不足於彼耶何敢仇彼後其人
有戰功公拔之官至游擊移營溧水有貴州軍與所部四川軍素不相
能人咸難之公曰天下詎有不可用之兵哉在將兵者御得其道而已
久之黔蜀兩營竟安居無猜自從征廣西至江南始終八年大小數百
戰身被十數創每臨陣輒語其下曰坤元武夫也父子均荷

國恩無可報效惟有戰耳今日戰勝則歸不勝當自擊死必無面目與
諸軍相見也其立志如此死時年二十七尙未娶無子持身尤廉除軍
器外絕無餘賞同列賻之不足鬻其所蓄之馬以成喪禮柩歸所過之
處居民無不焚香塞道及抵丹陽聚觀者皆哀悼泣下時人謂江南軍
營名將張忠武外公當首屈一指也

論曰虎忠壯公之爲將也百戰百勝威振江南婦人孺子皆知其名爲
人言語質簡貌亦樸厚殺賊而能愛民蓋勇而仁者也其忠義出天性
臨戰而不顧身極似明黃靖南一流上元諸生伍承組公之幕客也嘗

次公行事爲之傳余爲剛其繁冗而以他書所載公戰功補其缺漏云

蕭剛勇彭果毅劉忠壯周愨烈彭武烈公別傳李元度

烏虜當李忠武之師覆三河也員弁死綏多至數百人名將勁旅猝投

一燼其中尤敢戰及死事尤烈應諡法者得五人焉此五人皆百戰之

餘從克名城以數十計忠武帥所部深入豈輕試虎口哉抑倚諸將能

戰守耳不自意爲援賊數十萬所乘天也而諸公廩廩然各以死報

國豈不誠烈丈夫哉余覽其事悲之作五公傳

蕭公意文字章甫湘鄉人隸羅忠節戲下以斬級功敘外委咸豐五年

從克義甯州擢把總

賞戴藍翎是年冬再錄從征通崇蒲圻功晉千總湘軍攻武昌公數陷

陣敘功遷守備武昌克晉都司七年從剿斬黃賊巢攻拔小池口偽城

克湖口縣破走梅家洲賊擢游擊加參將銜八年克九江以參將卽補

賞換花翎當是時李忠武奉

詔幫辦軍務進征皖北公帥所部從連克潛山太湖舒城桐城四縣遂

進攻三河鎮三河鎮者舒廬適中地賊立偽城待糧糗軍火以濟廬州

及江甯賊營者也別築九壘以衛之堅甚忠武銳意取之十月二日各

營分三路進剿公等攻河南街老鼠夾賊壘賊悉眾旅拒公冒礮雨先

進各營繼之縱火焚其壘賊大亂公身受礮創殊死戰不退遂奪柵入

九壘皆下壘中賊盡殲無脫者我軍傷亡亦千餘人公以創重歸營逾

時卒

詔贈副將旣副將例

賜卹

予諡剛勇

彭公友勝字雲臺長沙人初爲長沙協戰兵從征未陽新甯粵寇起從

征廣西以偵探功

賞六品服賊犯長沙隨隗威壯入城協守尋從江忠烈援江西並有功

江西圍解乃歸伍居頃之送戰艦於大營留爲水師營將賊擾漢黃公

駐師沌口平賊壘二斬偽丞相一武漢旣克隨官軍攻九江同敗賊於

童司簞平其壘時已涪擢游擊換花翎矣八年九江克復晉參將尋帥

所部征皖及賊戰於三河鎮力盡死之公饒膽略水陸戰必衝鋒大小

數十戰體無創痕軍中服其勇死事前夕忠武命公爲前鋒時九壘雖

破援賊復大至眾十餘萬距三河三十里我軍僅五千人又多苦戰受

創公上言宜堅守不可戰忠武笑曰若驍將今乃怯耶公默然詰旦領所部大呼陷陣賊披靡會大霧覲面不相見公已逼賊壘不覺也亡何援賊四合遂遇害

詔贈副將既副將例

賜卹

予諡果毅

劉公神山字佑甫湘鄉人咸豐初隸羅忠節湘右營從克武漢藍翎外委五年克義甯晉千總援湖北復通崇蒲圻進攻武昌大小七十戰公皆與遷守備武昌既克轉戰至黃州進都司七年從攻湖口破賊梅家洲擢游擊

舒桐公功最

詔以副將補用

三河之戰公首陷賊陣斬悍目數人追逼賊壘被抄襲圍之數重公左右馳突不能出手刃數賊而死亡年二十二

詔贈總兵既總兵例

賜卹

續傳卷六十五

子諡忠壯

周公福高字子祥湘鄉人從羅忠節援勦江鄂案功擢守備

賞戴藍翎李忠武接統湘軍再晉公都司以小池口梅家洲諸戰尤用

命

詔以游擊於軍中候補咸豐八年十月戰死三河鎮我軍之抵三河也援賊麇至諸將不欲戰知戰必敗相覲無人色公憤然曰敗則死耳吾輩畏死不來矣既至此致惜死以隳壯志乎力戰而死

詔贈副將既副將例

賜卹

予諡愍烈

彭公志德字道一湘鄉人隸湘軍以功敘把總咸豐六年軍次洪山攻武昌各營裏創喋血鏖戰五閱月不解鞍胡文忠遜敢死士數十人彙

奏請獎公與焉遂晉千總

賞藍翎武昌復以守備用七年勦黃州克湖口平小池口堅壘梅家洲

偽城公功皆最擢都司換花翎尋破彭澤宿松太湖諸縣每戰必為前驅不肯後人敘功遷游擊又以復麻城黃安功除參將加副將銜三河

之役忠武殉節諸營皆潰公率所部貫賊陣突出死者過半公亦受重創走入中右營與副將李存漢等竭力死守越三日營陷死之

詔贈副將貺副將例

賜卹

予諡武烈以上五人並

賞騎都尉世職

賜祭葬如例副祀李忠武專祠

南陽鎮總兵邱公傳

方宗誠

公姓邱氏名聯恩字偉堂泉州人以世襲男爵初為直隸副將咸豐四年河南捻匪起粵賊復上竄湖北逼豫疆用薦擢公南陽鎮總兵公居心忠純時以殺賊自任臨敵果勇異常賊畏之號為邱老虎云在南陽五年馳驅戎行日夜無休暇息縣李世林投誠餘黨丁心田聚眾擾烏龍集巡撫英桂令公往禽之湖北游勇倡亂破樊城撲鄧州眾萬餘人勢猖獗南陽告急公先以積勞患嘔血疾駐固始聞之即旋鎮簡精兵先挫其鋒復聯鄉團以助聲勢民乃安五年正月李士林敗死其下易天幅擁眾逃歸結汝陽巨匪王黨羅苗義息縣匪朱明義林其賢北逼馬鄉傷官兵南戕烏龍集州判遂破息縣圍光州據光山巡撫調公圍攻數日嚴守關隘絕其援賊宵遁公窮追大破之諸匪皆授首河北連莊會姦民滋事巡撫自督勦而以三關防堵事任公駐信陽時公舊疾發兼中風痺力疾奮勵如平時是冬張落刑龔瞎子等倡亂蒙亳歸陳震動他將勦撲數月無功

續傳卷六十五

至

上命巡撫往督師巡撫檄公先由閭道赴歸德六年正月會兵進戰公常居前敵屢挫之後遂有渦水雒河之捷七年春張龔二逆圍固始都統勝保擊敗之賊竄擾三河尖方家集分賊擾光息都統駐軍淇河北專防北竄南路無兵堵禦人情洶洶公率千餘人至光州知州鄭元善更簡精銳兵勇二千人屬公公進駐管家營距方家集二十餘里方家集賊老巢也五月六日公分軍四出自居中直擣賊壘賊傾巢出衝中軍公督戰良久無不一以當百破之乘勢入賊壘殺賊數千屍浮河而下者累日二逆由此膽落不敢窺南岸十六日賊遁三河尖都統由河北追勦公取道淮南進紮溝集賊遁正陽關公復追至連戰皆捷初公之破方家集也角子山捻匪乘隙作亂督兵者數失利巡撫檄公西征都統以賊雖敗竄公去恐復熾光息紳民亦惴惴恐公去乞留至是

正陽關克復東賊遠而西賊愈熾九月公奉檄往勦時都統德楞阿敗賊於確山公乘勝追擊連破之賊西竄入泌陽嵩縣諸山中出入無常公陟險絕幽搜勦數月羣盜平自公去光冬十二月張翼二逆結粵逆數萬圍固始七十餘日巡撫以公勦西匪得力不可中止八年春南陽賊平遂飭公來光時固始圍已解而粵逆又自皖竄楚破麻城公駐軍沙窩坊虎頭關策應光山商城賊遂未敢入豫境十月擒匪孫葵心竄周家口巡撫調公往破之於槐店十二月賊擾三河尖巡撫恆福新任命公勦辦公分兵至光防禦得安堵公自平丁心田後凡汝光閒疆邊有警上自士大夫下逮鄉里婦孺莫不嘖嘖望公來即傳之以爲慶賊聞之弱者遠竄強者戒備益嚴則皆曰邱老虎至矣公面方而黔微有痘斑顧視懍懍有威而內含慈惠身材中人丰采綽然每行軍所至將士如雲人爭識之當是時皖境皆賊豫與皖鄰無高山大川以爲之阻自公至豫賊雖屢擾邊而不能深入爲民害前巡撫英桂深任公故公得盡其才九年春賊自甯陵睢州竄入豫公連破之追至五溝營賊分爲二其東竄者公分兵擊於商水南藏之而自追其西然孤軍獨進無有與公夾擊者公方勦賊不遺餘力而恆福劾公以自謝過公不自

興續神傳卷六十五

七

明發憤追賊至舞陽北舞渡薄暮馳百餘里人馬皆未食時黑夜猝與賊遇彼此難辨公督戰急賊少卻追至殺虎橋公聞其名歎曰人謂吾虎也今當死於此矣豈非天平未幾賊大至圍之如重壁公潰圍出而復入屬從者多受傷勸公退守公殺所乘馬示無退志天色昏暗悲風四起賊死戰公力盡猶手殺賊十餘人竟戰隕於北舞渡時年四十六有六公卒後繼公督師者多不知兵賊遂徧竄河南郡邑閒數年民大困公治兵嚴紀律尤以愛民爲心不以供張累州縣州縣有以米錢犒士卒者則欣然儀分之兵所駐境上或逾旬經月商賈居民幾於不知有兵者前防堵光州時天沍寒出錢十緡屬一弁爲市舊羊裘弁獻狐裘錦其裘不取值公曰吾非以儉博名念士卒口糧幾何而導之靡勢益不給起而攘奪甚於寇賊而事不可爲矣卒以已錢市羊裘乃安時度支匱軍餉薄且緡公常節縮俸錢以給兵食而未嘗向人言也然士卒或不法輒嚴治之故軍中畏其嚴而樂其恩行軍數年雖無事未嘗解衣臥時訓練務使緩急可恃其勤奮持身仁義率下公忠體國數年如一日每戰克捷所向有功非偶然也嘗與人談及時事誓不與賊兩立其許

國之誠如此遇難後降將廢卒多泣下汴東南數百里士民道祭罷市而哭越十餘日始得公屍身被重傷而顏色如生然

又南陽總兵邱武烈公行狀

尹耕雲

公諱聯恩字偉堂福建同安人先世有武功父良功起家行伍任浙江提督從征蔡牽

封三等男世襲良功歿襲爵爲

乾清門侍衛道光二十三年授直隸通州協副將調河間協副將咸豐三年粵賊窺伺武漢全豫震動

天子念南陽屏蔽荆襄控扼汝洛乃進公爲總兵以鎮兵防新野公至微守備遠斥堠邊境恃以無恐而光固之賊起焉公馳往擊殺八百餘人誅賊目丁心田胡金斗等方進兵固始而粵賊上竄蕪黃再陷武漢

奉

命守信陽州閒以精兵往來光山息縣攻克其巢斬馘無算光固平六年亳捻張樂行擾歸德勢甚張豫撫英桂檄公往勦陷陣解亳州圍覆其雒河集老巢賊由潁州疾走固始三河尖偵公追至太和復回踞雒河集公乃倍道繞出賊前逆擊之賊大潰復連敗之賊窮蹙不知所爲

續碑傳卷六十五

語

而英桂檄公勦襄陽土匪回軍救鄧州公至復內鄉殲賊渠朱中立等襄陽之盜悉平張樂行以公去復振大股掠光固而分據洪河南北相掎角英桂復檄公勦是時勝保爲大帥以勁旅數萬攻北岸賊公以其眾千餘擊南岸賊旬日十餘戰殺賊殆盡公之功名驟出大帥右且光固襄鄧肅清皆公力捷聞廟公名姓於眾將中

天子諡公忠勇詔加圖薩蘭巴圖魯名號先是敘平光固功

賞花翎至是復得勇號公益感奮乃以所部追賊而東扼霍邱六安境

上是時張樂行龔瞎子皆聚於皖北皖北游荒守令重虐其民民困而

從賊賊分其目爲五旗旗所領各五眾不下數十萬渦淮以東蒙懷靈

毫千餘里皆賊屯且耕且戰官兵嬰之輒潰敗惟憚公見旗幟卽遁公

亦銳以滅賊自任而泌陽之賊起南陽戒嚴公至賊投戈其不降者驅

諸龍洞山而戮之事甫定英桂檄公往內鄉勦西山賊回環數百里與

關中南山秦嶺相錯路陡仄又天寒人馬不易行英桂促公入山過

十八盤大雪迷道裹糧皆絕士卒多墜澗死公亦墜攀藤葛乃免搏雪

以食越嶺前進賊偵公來大股由山後去餘眾綴巖壑間出沒以誘我師故功不時就而英桂劾公摘翎頂公躡賊及諸角子山生禽賊目胡

倫脩等百數十人而巨逆張汝成猶率死黨竄渣呀口公夜登火其穴
殲其眾事聞復翎頂八年皖賊陷楚麻城公自汝甯移師光山遏奔竄
賊爲楚軍所逼將突商城公自徐家集銀山畝逆之接戰八晝夜賊乃
遁歸於是公與皖軍約會勦次師息縣而豫撫英桂檄公回駐光州未
幾張樂行之眾入周家口又檄公防鹿邑九年二月賊自歸德西竄攻
西華陷甯陵睢州公馳及之鏖戰於夾河套追遙集斬瘡數千復二城
西華解圍賊趨鄆城分道出五虎營掠上蔡而大股悉至舞陽北舞渡
將道襄城竄汴梁公念省垣重地守備空虛乃逆戰於西北原是時我
軍僅數千而賊眾數萬圍我數重兩時之久我軍潰圍而出及縱虎橋
伏起裏我大風晝晦公身負重傷猶執旗指麾有自後斫公者而公隕
矣咸豐九年二月二十五日也前一日豫撫恆福以睢甯之失劾公褫
職公聞而慨然曰遲速死耳得裹尸以報

朝廷足矣遂致命焉狀

聞復原官照提督陣亡例優卹

予諡武烈公每戰先士卒師所至無秋豪犯民載芻糧以餉師公不受
餉者委諸門外而去及其歿也巷哭數日豫撫英傑上其事詔於南陽

續碑傳卷六十五

五

建專祠原籍如之公死閏十日乃於麥田得公尸猶切齒作怒狀士女
羅拜色稍霽者民趙介珩獻其櫬以斂公喪至南陽南陽請留葬攀臥
數月乃得歸葬於閻公生於嘉慶十有七年距陣亡之日年四十八歲
公室蘇夫人道光二十八年歸甯後道梗不復北來箴室袁氏隨鎮任
統兵六年不一歸視故卒無子以族子炳忠炳義爲嗣女一適內閣中
書黃貽楫以所爲事略畱余故論次之以備史官之采擇焉

忠節十三

江南提督張忠武公小傳

馮桂芬

公姓張氏名國樑初名嘉祥廣東高要人年十有五賈廣西貴縣三載為土豪所辱怒率眾毀其家官名捕亡命為羣盜盜有道人為之語曰濟弱鋤強張嘉祥撫部勞公崇光聞而招之道光二十有九年公隻身詣左江鎮受撫檄勦土匪顏品瑤潘七大李樹青等事平還報勞公奇賞之令執贄門下為改今名字之曰殿臣示期望望洪秀全反公始屬向公榮部下檄率二百人破賊數萬於新甯捷上授守備

賞戴花翎咸豐二年三月從剿湖南敗賊於道州蛇皮嶺克永安州追賊自湖南至湖北破洪山寺賊壘升都司

賞給霍羅琦巴圖魯勇號無何賊陷武昌眾數十萬蔽江東下不旬日連陷九江安慶太平江甯大軍由陸路追之抵九江賊去城空湖口無船不得渡留十有五日始渡比至江甯而城先十日陷矣進攻之軍鍾

山久之復江浦洧升福建漳州鎮總兵六年夏五月蘇撫吉勇烈公敗於鎮江死之未幾而有向軍鍾山之潰諸將震恐公從容指麾始得全師退次丹陽尋復進向公奏以公總統南北諸軍旋解金壇圍奉

續碑傳卷六十六

旨幫辦軍務乘勝復句容

賞穿黃馬褂復鎮江

與騎都尉世職擢湖南提督復秣陵關

賞換雙眼花翎調江南提督復揚州儀徵晉三等輕車都尉復九洲

晉二等公受知向公倚如左右手大營先後奏捷數十皆公功也江南北數百里內有警輒單軍馳援無虛月所至輒大捷迭荷

先帝褒旨賜上方珍異嘗傷於指

賜御用藥散尤異數既向公卒某帥驕慢不省事又忌公事事齟齬之公度不得行其志誓以身殉抉一齒寄家示無還期公築長圍困賊期

年而成攻益力城垂破各路援賊四至某帥方以不破城不發餉激軍軍屢譁不為動公跪諫繼以泣不聽檄調副帥某回營七往返總督留

自衛不遣公尋以追賊至鎮江賊突出犯大營某帥遁軍大潰公聞變

馳至丹陽東遇賊大戰傷重下馬向

關再拜曰臣力竭矣復進望賊營而馳渡河人馬俱沒時十年閏三月

晦也公從軍十年與士卒同甘苦士卒愛而畏之大營餉絀而譁至牙傷向公臂萬眾洶洶公聞率小隊馳至乃散公令曰罪人吾知之諸營盡今日縛以來則已不者張某且殲其營日晡得三十餘人殺之卒無事軍令嚴所過秋毫無害身經數百戰未嘗敗北賊畏之如虎旣薨鎮江營多公舊部賊至假公旗以出賊披靡陰雨中賊輒望見公旗故賊猶傳公不死神矣哉公戰陣出新意善察地勢動合古兵法向公以六合新勇隸公公試之曰若未能戰也雖然宜令若立功將戰公匹馬環視數十里中得一僻地令營之曰旦日賊零星過若營若出盡殺之已而果然故勇人人自奮願從公其援六合也相賊船所泊岸數里外令土人曰若爲我築土牆自某至某內外各一外長二里許內倍之而斷其中牆成以告吾爲若殲此賊及戰賊大敗奔所泊岸皆循內牆左右走出牆斷處見外牆則大驚亂追騎及之無一逸者九洲之役公作背水陣四眼狗率眾數十萬追我軍於江濟公徙舟去岸令曰私渡江者斬賊連踰我營數十周提督天培歿於陣眾頗懼公手刃一人以徇曰今日進則生退則死耳麾眾而前無不一當百賊大敗走遂復九洲洲其布置多此類又善以少擊眾其復太平也以五百人從至則賊酋

額神傳卷六十六

二

觀劇城外公突至大呼殺賊賊奔入城公麾兵隨之而入城遂復往返七日耳軍中歌曰張國樑走馬取太平其援鎮江也比至而賊退將歸金陵吉勇烈饑之九華山酒中報賊至出擊不利公飲啖自如呼其屬曰賊近以告俄而四山鼓譟鎗礮若雷公起更衣曰請從此別出營門立而指揮分兵作數隊揚旗出公潛由僻路下山抄賊背急攻之與勇烈夾擊賊大敗死者無算公遂歸金陵是役也賊數萬公卒僅數百云公之過丹陽也周走四城召父老謂曰此城無守法若等速東去我留待若公植立城上賊望見之不敢近盡一日城空乃行往歲蘇州設撫郵局公書來云貴局多一難民卽做營少一死賊公在軍殺賊以萬計而仁心爲質有如此公長身力舉千鈞而狀貌如婦人好女待人以謙尤重儒士稱於我輩曰晚生公軍出溧水縣令供帳南門公率親軍百餘人至北門時漏三下叩門求宿無應者得一古寺小憩公以下皆藉草臥黎明縣令倉皇至謝罪公曰吾愛此寺僻眠甚適不及至南門耳遂馳去卒無芥蒂其大度又如此軍暇輒作虎字大徑丈中直墨半枯吃如鐵柱名書家所不及廉俸盡以分士卒不名一錢計至粵一子蔭清幼四壁蕭然勞公方督粵厚賻之始成禮可敬也已公薨江南皆賊

地後數月始得公死事狀以聞

先帝震悼與優卹

贈太子太保晉一等輕車都尉祀昭忠立祠蘇粵

賜諡忠武

上卽位

特詔加祭一壇

舊史氏曰癸丑春賊陷金陵長驅南下有席卷江浙之勢矣得遷延至

八年之久以公力也公死逾月而江南數十州縣忽諸

詔有曰東南半壁倚為長城尚冀該提督不死出為國家宣勞又曰若

張國樑尚在蘇常一帶何至糜爛若此然則丹陽河之溺非公一人溺

也江浙億萬生靈胥溺焉天乎不已酷乎

張忠武公事狀 虎總兵掛元附 廟雲

張忠武公國樑字殿臣嘉祥其原名也廣東花縣人 或曰高要縣 少無藉

父賈廣西貴縣走依焉年裁十五六鬱鬱無所見則用豪俠自喜敢為

其難遠近以氣下之士豪富而暴眾嫉之久會又辱其同儕則怒往覆

焉莫誰何者然亦無他侵暴眾愈歸之一時為之語曰強如狼弱如羊

鋤強扶弱張家祥方洪逆之起金田也勢遠張羣不逞往往逐聲響應

之或說忠武與合則慨然曰所貴豪傑能球民耳戕之以逞賊而已矣

勞巡撫崇光積前所聞民閒語曰是其人勇且知義撫而用之必為

國盡臣忠武則單騎走謁於左江鎮崇光一見褒異俾執弟子禮時道

光二十九年也越咸豐十年死綏丹陽崇光為位於廣東以哭曰吾門

得公良不負一慟幾絕於是所在賊起忠武勦之既有功而洪逆旋以

賊數萬走新甯州率驍健二百人破之授守備

賞戴花翎咸豐二年遂率偏師出廣西境既入湖南破賊於道州蛇皮

嶺進復永安州又破之於長沙新開鋪賊遁湖北則又破之於湖北洪

山寺夷其壘遂以都司

賞霍羅琦巴圖魯勇號仍率偏師從向提督榮循江而東忠武身不踰

中人面白皙正方而中隆目秀長寸許而言論溫溫接士大夫以禮問

旁近所由阨塞與步騎之宜若野老田夫則作好語問所苦見者忘其

為大將也當是時賊據江甯為偽都而鎮江揚州相繼陷向榮以欽差

大臣督元從諸軍駐江甯都統琦善以欽差大臣督非來新集諸軍駐揚州所稱江南北兩大營者也南軍聲威出北軍上遠甚故非軍自琦

卒托明阿繼之托罷去德興阿繼之德罷去北軍遂兼轄於江南大營不復置帥南軍旣以聲威聞天下尤稱忠武其未投欽差幫辦大臣以前三數年閒江南非所在郡縣告警輒往援輒立解烽埃相望賊懼其至民又懼其弗至焉用都司積功授漳州鎮總兵移壽春鎮加提督銜而太平之功特奇始軍未至太平數室舍之獨身往視形勢迤行至城下門者闐然入之慮有伏則哀走女牆閒騰堞上之道一巨宅故賊酋所處闔戶入見酋方擁婦人臥一笑刃之攜兩級出遇賊媼數輩則唬而奔方意何亡備若是俄歌吹作蓋賊中方演劇諸所守衛悉弛以觀則亦循聲往往卽躍登其臺手兩級而舞眾皇駭頃賊酋所七賊追至以級抵其二墜手刃三餘二逸然後攫身下大呼殺賊萬眾崩潰軍至遂乘馬是役也實下以一人進攻旁近壘克之忠武每戰足麻屨布帛首若行滕綢縛胸背累數疊遇賊不甚恃火器時賊之轟擊且伏且進益近賊賊轟擊益力則覷破發子過逆濃煙翔入所部從之白刃若雨下其以數百人覆賊萬人若數萬屢矣又稔諸酋伎倆所長短而逆以中之以故所當雖劇賊輒望風潰往往索一戰不可得則舉軍中旗鼓悉易焉而建他將之纛賊誤攫之輒衄則大驚海六年賊襲破江

新神傳卷六十六

大營揚州再陷江浦浦口等處繼之而賊尤積怒六合以前令溫紹原遙領江甯府總六合防務屢挫賊賊至是益眾往攻勢危甚於是忠武絕江援之紹原聞大喜旣至視其軍不足千人又以遠涉故散坐廢壘或席濠墻而臥狀若弗勝兵紹原則大駭俄謀報忠武稱賊至問遠近日二十里許曰未也俄又稱賊至問遠近日十里許曰未也俄又稱賊至者數四問遠近日不下五里矣曰可矣而橫刀旁侍者出腰閒角鳴之臥若坐者皆起視纛所嚮擁之以馳悍然皆驍健也紹原則大惑率所屬繼焉戰甫交而忠武暨數百人者遽驀入賊中跳身盪決俄而賊陳亂潰去疾追至藏軍營盤城集再戰再破之連復浦口江浦紹原甚德之私於所部曰若公何好曰我公於子女玉帛未始以一瞬獨好調馬雖極城怒不可羈勒袒而上手夷礮震之聳岡竊澗挾風電俱過不三數復馴矣紹原則大歎服謁忠武舉嚮所答謀者以問曰此易知也道始戰地云何曰龍池曰吾愿視所由率挾隘不足戰獨所云龍池者其地曠衍可任縱橫是以須之至非徒以逸待勞也其夏巡撫吉爾杭阿戰沒高資而九華山之軍戍自江北大營者又潰而江南大營旣以聲威爲天下望自所轄外先後援上海援廬州援浙若聞近數百里遠

乃二三千里提軍四出累月不歸而壘闕軍單遂爲羣賊所萃最後十年之役忠武死綏丹陽亦職此也於是向榮奏以忠武總統南北諸軍退守丹陽用有珥陵之戰珥陵俗曰珥村隸丹陽南朝諸陵在焉當是時賊豔蘇常諸郡久扼於我軍苦不得逞而吾軍亦以財賦所出半天下正供之外藉以資軍故力爲捍蔽至是賊乘勢出全力爭之而虎坤元故統一軍於此坤元者字子厚四川人亦驍將提督嵩林子軍中以小虎名之別於其父父嘗以故當法坤元號泣帥前請以己官贖父罪否則代以身言訖拔刃自擬帥惜其材許以功贖於是戰必先登嘗敗賊十數萬於高資遂克鎮江復父所失溧水坤元每戰好奪纛選所部惡少年百許千金名馬配之背負紅旗一縱廣各四尺遇賊輒亂陳入望之如火雲飛翻爲風所掣俄鉅黃旗十數掩映其間則所手奪於賊者橫舞之而出以故賊望見紅旗一簇輒曰是小虎不可當倒卷其纛以遁而其戰沒秣陵關亦以獨騎馳萬賊中奪纛既倒之矣遽爲伏賊所中年裁二十許以贖父故官再至總兵卽眞方其軍珥陵旁近民積爲他軍所患苦坤元至躬往撫問遂羣歐之既歸一軍皆甲坤元亟令開營門然後喻之曰是吾過也吾往而弗先彼詎吾識語次稷鋤千百

續傳卷六十六 五

藥粟然至聲言逐之弗去者將禽取生埋之坤元亟登營牆慰遣弗聽至有進剗其壘者不獲已取獵者之子內鎗中然火發之傷十數人始駭而反時謂坤元於是非徒驍將也忠武既殿軍至珥陵與坤元合日暮張筵召諸將飲酒數巡具冠服拜於階下諸將大驚爭席膝至地忠武慷慨言曰勞諸君血戰數年良苦今一旦糜爛至此而向帥又病東南半壁視翼日一戰勝良善不然國樑必死於是今之置酒與諸君別也坤元遽推案前擁忠武起曰過此半步而死者非夫坤元請騎當前敵公步繼之計吞此賊必矣忠武笑撫其背曰壯哉雖然前敵吾自當之君可繼諸將亦各以死誓翼日賊盛至我軍裁當什之一逆前塵戰礮聲猛烈萬雷一奮崩崖頽谷天地晦冥戰塵騰起數十丈劇賊排牆進忠武洞入中堅諸將繼之剽疾震盪血肉橫飛賊前者已盡後者復進如前我軍始番休旣悉一軍覆釜起饑則束其腹渴以吻就賊項飲之愈戰愈厲歷兩晝夜賊始大潰以奔而他賊圍金壇以抄我丹陽之後者並進解之遂以提督拜欽差幫辦軍務之命會向榮病歿總督怡良攝其事亦能以便宜而句容鎮江暨秣陵關以次復北渡江復揚州儀徵而九洲洲號當賊衝并復之分軍以守然後南返築長濠江

甯積功授廣西提督歷移湖南江南世襲騎都尉既又襲三等輕車都尉尋改二等

賞穿黃馬褂換雙眼花翎加太子少保并以平鍾山賊壘礮斷中指賜御用藥散

恩數頗繁不可殫述而

詔書慰勉有勇猛之中加以謹慎訓辭脫摯藹然家人父子忠武感激圖報故雖怡良保故等夷如提督和春爲欽差大臣來繼向榮無幾微見於色識者多之忠武自少時志球民困故軍行所至一無侵犯民爭依焉長濠之役凡直墳墓輒令移座他所有碍者仍之否亦各加標記識所由來其用心仁厚如此嚮使功與時會江甯遂下決不至若閒者攘剔爬梳俾埽地赤立宜乎所在父老悲思至今長濠旣成而江甯之圍遂合城賊糧盡困甚幾下者數矣而安徽羣賊遽陷浙會城遣軍往復之未歸而濱江要壘暨旁近郡邑攻守乞援輒遣軍往以故軍雖八萬而遠征旣多居守益少而賊之自浙回竄者與安徽江北諸賊十道並進忠武則急檄援浙張玉良會軍城下冀一鼓下江甯然後逆破羣賊總督何桂清持之或尤忤其功餉不時給忠武知事不可爲抉一齒

續碑傳卷六十六

六

界家人歸報曰馬革裹尸亦豈易得他日葬此可也會天大雨澗月不絕賊至和春退軍因之潰忠武方出相戰地間變搏膺大呼墜馬幾絕旣料餘軍爲民殿且戰且卻至丹陽城下受數創探懷中印付所部令亟走然後下馬北向再拜曰臣力盡矣而民環萬數號哭請勿死曰留活吾儕忠武曰苟可擋柱吾敢以一死謝責乃檄軍者七請餉者三皆弗應彼欲死吾久矣然死吾可也使吾死兼負

國與民死且目不瞑言訖策馬望城濠馳下民爭前擁之時方盛漲遂并沒於中流時十年又三月二十有九日也忠武旣死綏而蘇常諸郡號爲財賦之區者悉覆於賊且延及浙閩一身所繫豈其微哉事

聞朝野大震

贈太子太保諡忠武入祀昭忠祠并立功所在各立專祠而所下

詔書尤極哀痛爲軍興來所未有焉

又贈太子太保江南提督張忠武公事狀程駭

公姓張諱國樑字殿臣廣東花縣人也初名嘉祥弱冠擅材武喜任俠人語曰拯弱鋤強張嘉祥在橫州江次勒派來往估船州牧以謀叛報收捕公聞信逸去爲盜官兵往捕輒敗營弁被執者厚遇之時粵西洪

逆已叛招公公罵曰草賊敢辱我乎當滅汝以報

國耳藩司勞公崇光因密招之公欣然反正隸總兵德亮時公部精兵五千人當事疑之乃散其大半時道光二十九年己酉也後德亮失官駐公營累年老思歸公執禮弗衰又出重賞以贖乃改隸向忠武初未知之與賊累戰累捷常以寡擊眾由湘而鄂而吳靡役不先忠武始異之倚爲軍鋒累功至都司咸豐三年癸丑隨忠武進圍江甯首破城外賊壘礮擊斷中指

恩賞御用藥散疊

賜御物升補參將先是賊破江甯擬長驅下蘇州至是始斂迹其復太平也賊人近萬不虞官軍之至於城外開戲場公領千人猝至入其城度賊盡奔入乃下令閉城殺賊無一脫者旋以大營有警調回往返僅七日升福建漳州鎮總兵渡江克復浦口江浦往返不及二旬加提督銜六年丙辰江西賊下竄連營數百里自江甯城外達石埠橋高資下蜀街思援鎮江瓜洲鎮江主兵者中丞忠烈吉爾杭阿瓜洲主兵者將軍托明阿吉銳志滅賊公督兵合拒賊於高資賊不得逞乃渡江犯六合公知之率兵往援賊未至六合三十里諜來報溫觀察紹原請行

續神傳卷六十六

七

公飲酒談笑自若諜又至曰去城二十里矣公飲如故已而報曰十里矣公乃擲杯脫靴帽頭纏黑布一疋下拖被地跳其足手雙刀上馬目突出光如炬鋒乍交溫方率勇擬爲後應而公已被賊吼唱而回又追破賊於江浦復之江浦令某來謁畏罪跪伏甚恭公手起之慰曰君書生焉能當此巨寇過在我輩當代乞恩大帥勿怖也其謙和近人類如此公之援六合也江南之賊覘公不在進力戕忠烈公於高資鎮江大營潰旋渡江犯長圍瓜洲大營亦潰公聞信急過江赴援不及賊勢益熾遂合攻向忠武大營公方在外禦敵諸將王浚遽議退避命入中軍負忠武以走公始知之力言退軍易進軍難浚不聽眾遂大潰公不得已爲後殿復回營焚火藥糧草乃追及忠武於丹陽向忠武奏請總統諸軍旬日之閒招集流亡號令旣施壁壘一新旌旗變色賊至連戰皆大捷丹陽解圍向忠武旋薨權之者總督怡良大營之潰也怡良公駐營常州城外發銀數萬兵勇逃至者立與銀一兩回丹陽否則按律定罪兵勇畏服公之立刻成軍怡良公與有力焉至是謂公曰我文臣安知軍事今一以委公

皇上命我坐鎮但主草奏耳故公得盡力而權不分欽差幫辦江南軍

務進軍句容而實授欽差大臣江甯將軍和春公至時賊勢方盛欲急攻公諫不聽已而果敗賴公救得免慚且忌軍氣爲沮而公折節下之旋克復句容溧水進軍江甯劃平城外賊壘掘長濠困之分軍斷其糧道賊大挫堅守雖劇賊四眼狗亦憚公威不敢戰七年丁巳克復鎮江賊勢愈弱升授江南提督八年戊午毫穎捻匪大熾與粵寇合粵寇勢亦熾賊酋陳玉成李秀成蠶食皖北公議分軍守金陵而往誅之不聽賊遂陷江浦圍六合儀徵天長揚州皆陷秋九月公督軍來援至萬福橋無舟以濟河水闊甚眾憚之旣而得小舟公自率數人先登岸爲浮橋以過軍賊聞公至一日夜狂奔二百里盡棄揚州儀徵公自追奔未至六合十餘里而城已先陷方議進攻會江南賊乘隙犯長圍溧水復陷調公回禦卽由儀徵渡江而溧水之賊又遁去以功世襲三等輕車都尉當是時徵公來江北遺民幾盡大約公至一處則一處賊遁而民獲安他將張其旗猶足威敵而自保時王浚爲翼長大帥信之浚因譖公而公益自下九年己未大戰江南北他將或不得力未收全功十年庚申克復九洲洲以萬人守之九洲洲者江南北之咽喉也旣爲我據賊水泄不通江甯人相食且夕可下而皖北諸賊議救巢穴由閒道襲

續傳卷六十六

陷杭州斷公糧道公議已與總兵張玉良分一人往援大帥派玉良往賊見官軍旗幟知江甯兵勢已分由廣德甯國徑犯高淳溧水句容前迫大營公議分兵往禦而精銳多往杭州大帥又畏賊不聽公往乃檄玉良回救師至常州總督何桂清留之檄五至不遣玉良亦忠勇善戰願以名出公下不相能兵勇亦苟安救不至議者謂如公往杭州必能回救大營保全大局時欠勇糧久公請發餉一戰大帥不許軍心益懈三月十七日風霆雨雪火器不然外賊與城賊夾攻大營眾大潰公獨爲後殿難民扶老攜幼隨公自拔者十餘萬人公與大帥議分所向大帥意丹陽有常州援兵乃自任丹陽而以鎮江屬公公至鎮江布置精密大帥至丹陽常州援兵不至而賊已逼城下不得已仍乞援於公公聞命卽率輕兵往馬忽自斃王浚以扇馬贈公試之墮傷時間三月二十八日也次日公負傷出隊賊兵四合酣戰未決城中火起大帥遁去軍大亂公知不濟策馬渡河人馬俱沒於水大帥旋死許墅關王浚亦死何桂清張玉良棄師走江南數十州縣一月之間悉沒於賊而公麾下守鎮江者佯言公不死以懼賊賊悉眾來犯忽自反走官軍乘之大勝俘囚日見人馬無數蔽空而下皆張宇旗疑公尙在故也公以聞

三月二十九日戰沒年三十八歲
顯廟以遺屍未得初得奏報猶冀未確尚能復出宣勞數月未忍議卹

八月十七日始
追贈太子太保照提督例從優議卹入祀昭忠祠並建立專祠有若張

國樑尚在蘇常一帶何至糜爛至此之
諭子一名蔭清兄弟各一公雖貴不與保舉故不著公性廉祿入皆分

戰士家無餘貲沒後勞公崇光督兩廣厚恤之喪乃成禮同治三年甲

子金陵克復忠逆李秀成謂葬於尹公橋旁之寶塔下始得其實公文

弱如書生雅歌投壺暇則讀書與人言必盡誠待僚屬厚有曾居其上

者公後貴執屬員禮益恭過軍之處愛民如子農夫荷耜以觀顧事多

掣肘恆發憤謂賊平當削髮為僧又以
聖恩重大誓以身殉嘗患齒痛輒落之寄其子收藏蓋捐軀其素志也

大功告成兩奉
上諭追念勞臣加
恩賜祭公皆與焉
論曰議者多謂公攻江甯浚長濠失算不知楚師克復九江安慶江甯

皆未嘗不浚長濠公之敗以有守兵無應兵又事權不一戮力無人耳
過不在長濠也議者又謂當大帥不發餉時公何不强諫以濟而必謙

讓未遑非策也不知人方忌公甚而公乃必行其志以為口實事雖濟
其異於鼓眾鬪餉者幾何哉公必不為也況大帥已敗公猶必奉其令

與之逆力又肯自取背上之愆乎議者又謂公出身太早惜不居曾李
麾下與鮑劉諸人爭烈而屈於權貴齋志以沒不知曾李麾下材勇輩

出不少一公而公但依附末光論功行賞轉無以獨享大名而士民之
謳歌勿輟亦必不能如今日之甚天之以摧折為玉成者非淺鮮也夫

張忠武公行略 蔣敦復
咸豐十年春閏月江南大營潰欽差幫辦軍務總統南北諸軍提督軍

門張公國樑力戰死事聞
天子追念蓋臣

綸音哀悼
贈恤有加越三年

今上登極改元同治
兩聖聽政大申黜陟羣盜次第就戮海寓指日蕩平而公之行狀及銘

幽表隨之文未有作者草莽臣蔣敦復伏讀

先皇帝聖諭有云東南半壁倚為長城尚冀該提督不死出為國家宣勞又云若張國樑尚在蘇常一帶何至糜爛若此等語感激涕零撫膺浩歎爰詢公之舊部曲將校及粵人之能道公遺事者綴拾成行略一篇身非史官不能作傳謹以俟當事者采而上於

朝公姓張氏初名嘉祥廣東高要人生而長身矗立材武絕人年十五之粵西貴縣從其叔父賈顧心弗喜也喜任俠結客鬥雞走狗跳刀拍張與羣少年游輒以氣懾服儕輩咸兄事之會其黨有為土豪所困者公怒率眾往劫破其質庫土豪訟名捕弗能得而公之義聲已震為羣盜所推有眾萬人不妄殺掠人為之語曰拯弱鋤強張嘉祥前廣西巡撫今制府勞公聞而異之遣大將招撫道光二十九年公單騎受撫於左江鎮尋捧檄勦土匪顏品瑤潘七大李樹青等境內肅清入謁幕府撫部深器重之使執費從弟子列乃改今名曰國樑字殿臣公由是感激思立奇功答知已逆匪洪秀全事起撫部檄公募勇往剿以二百人破賊數萬於新甯州咸豐二年三月調赴湖南破賊於道州蛇皮嶺克永安州追賊至長沙省城南路新開鋪賊竄湖北復追剿至武昌

續碑傳卷六十六

省城攻破洪山寺賊壘自新甯州之捷入奏奉

旨賞戴花翎補授守備至是升都司

賞給霍羅琦巴圖魯勇號時洪逆已從九江順流下竊據金陵矣公之立功自力保桂林始後逐賊楚南北直抵江甯省城均與提督向公俱相倚如左右手賊聚太平向帥問諸將孰敢往取賊巢無應者公慨然上馬行所部五百人從之賊眾聞公至大驚棄城走公徐按轡入城市不改肆事畢歸報往返僅七日軍中唱凱歌曰張國樑走馬取太平前後奏捷晉階洊升至福建漳州鎮總兵官率師渡江取浦口及江浦縣城往返亦不及二旬晉提督銜六年五月九華山之師潰吉帥死諸將擁兵觀望大勢幾不支於是向帥奏請以公總統南北諸軍旬日閒招集流亡立解金壇之圍

朝廷嘉之始拜欽差幫辦軍務之命嗣此乘勝克復句容鎮江進擣秣陵關馳往江北復揚郡儀徵復渡江圍江甯城外賊營築長濠以困之經畫數年破賊形勢已在掌握而九洲洲正當賊衝亦為我軍所據先是公平鍾山賊壘被破擊傷中指蒙

恩賞給御用藥散復句容

賞穿黃馬鞋復鎮江升授湖南提督世襲騎都尉復秣陵關
賞換雙眼花翎調補江南提督復揚州儀徵蒙

恩世襲三等輕車都尉復九洲蒙

恩世襲二等輕車都尉中間

尚方珍玩

恩賜駱驛異數頻頒

溫綸壘至日者

先帝聖訓勇猛之中加以慎重公自念遠方武臣受任非常雖誦感泣
日夜圖報當是時向帥已積勞薨於軍欽差大臣和春不諳軍旅餉不
時給公功名既盛忌者益多方沮撓先後屢失事機度賊未易滅誓以
身殉扶一齒昇家人歸報示無還期江甯賊受圍久勢憊甚城垂破者
屢矣爲出柙計乃集各路劇賊思并力一決勝負亡何官軍缺餉已五
閱月士卒洶洶脫巾一呼慮在旦夕以公故猶未忍公不得已躬謁和
帥所長跪告急繼之以泣卒弗許退而念此饑軍終不支亟檄召副統
帥某兵翼相與戮力一鼓下省城禽賊首出萬死不顧一身事或濟副
帥將行留守常郡何制府尼之羽書七往返不至賊聞之急攻官軍官
軍謀於營和帥遁師大潰公聞變搏膺而呼墜馬幾絕立馳自鎮江至
丹陽城下與賊戰傷重知不免探懷中印授材官某令走報下馬向
關再拜曰臣力盡矣復上馬大呼望賊營而馳亂流渡河人馬俱沒於
水時十年閏三月二十九日也嗚呼公在而東南大局支持八載公歿
甫逾月常蘇二郡相繼淪失江南數十州縣十陷八九然則公之一身
存亡安危所繫豈淺鮮哉

先帝初得奏報以尸骸未獲數月未忍議卹八月十七日奉

上諭著照提督陣亡例從優賜卹晉贈太子太保入祀昭忠祠其死事
及原籍地方並立專祠子孫俟服闋後送部引見頃之禮官議諡忠武
制曰可洪惟我

國家勸忠之典逾格優加凡在臣子宜如何報如公之忘身殉義

先帝重惜其死彼全軀保妻子者失其本心奚以戴皇天而履后土也

公年十八作盜魁二十八折節從軍爲

國虎臣三十八而致命遂志平生大小數百戰無不以其身爲士卒
先其用兵也善以少擊眾每出己意作進止率與古法暗合自偏裨擢
至大帥所得祿俸悉予戰士未嘗名一錢置一產爲子孫計子一蔭清

尚幼及公之喪至粵制府勞公厚賻之始克成禮嗚呼難矣公之走丹陽也男女老穉遮道乞留與俱守丹陽城小而陋無險可扼公策馬圍視太息曰事不可爲矣汝曹速去我暫留各泣拜去公植立城上賊望見之不敢進良久度民盡去城空乃下流離顛沛中猶不忍於民若此求之古名將中不數數觀其他軼事多傳聞不具書懼誣也

書江南總統向張二公事

謝應芝

成豐十年總統向公榮卒於軍遺疏以內事付和春外事付張國樑皇上震悼諡曰忠武而和春代其職張國樑同理軍務粵賊自三年陷江甯又陷鎮江揚州向公以總兵官帥大軍馳至禦賊於淳化鎮蔽障江南數年安堵公之力也公老將出昭武侯楊遇春麾下粵中始亂卽履行陣數戰爲軍鋒故制以親臣爲將軍統大兵而公疏逃武職輒當巨任蓋稔公忠勤武勇也然公之功尤以識拔張國樑爲最山陰周素人從軍江甯大營旣而駐常州爲余言張公常語其將士曰某起向忠武部下受公訓誨每一捷責輒增益才略得以成就至此某於汝等數捷責而無所增益爲何先是賊中有驍將善戰向公謀殺之張公出戰佯敗棄兵器而走賊將追及之禽置馬上挾利刀刺賊將洞胸墜馬死

續碑傳卷六十六

上

向公親帥大軍策應擊退羣賊以所乘馬乘張公歸營儲蓐湯手執器飲之自免冠戴公首一軍呼歡張公好裸戰一日渡河擊賊賊大至公毀其橋如淮陰之背水陣裸身奮勇當先軍士無不以一當什賊眾披靡公每戰輒勝賊中望見張字旗卽退避公親兵數十人同甘苦以弟兄相呼選其貌類己者以張字旗出戰無不勝時或自臨陣故偃其旗殺賊旣多賊見公面辟易驟樹張字旗賊眾大奔向公倚如左右手總督吉爾杭阿失事死賊大至賊嘗四出攻掠爭求救於大營向公無不以兵應之營中兵日減爲空營以張勢及是不支向公拔刀將自刎張公急止之曰公死事不濟矣勸公移營丹陽扼要盜賊不能南下然向公以是鬱鬱而卒臨歿奮呼殺賊論者比公於宋之宗留守而比張公爲岳忠武云或曰張公之勇旣如此向公之知張公又如此胡不舉以自代耶是未知向公之心者也向公嘗語人曰某本戰將材當此大任不克輕身出戰奈何公以和春主兵欲盡張公之材俾得奮身殺賊以

報

國也明年張公克復鎮江欲圖江甯蘇州有解餉官至營中公慨然謂之曰人咎某老師糜餉然賊眾我寡能備餉募鄉勇益兵方可集事其

人反至常州以言當事泄泄謂江甯指日可破不以公之言爲然也十年賊窺杭州當事檄公往援并檄公至常州公率於賊不克至衙之迄公事急遂不救故敗公無餘財金帛悉以犒軍嘗以故衣於常州染肆中復染肆人謂余曰觀其衣想見公長身魁梧真大將也軍中餉缺和春有銀數萬公勸之出以餉軍不聽軍遂潰賊乘變大至公急入亂軍中挾和春退至丹陽而自移營鎮江相倚角潰軍掠丹陽父老執香詣公軍門叩頭請撫公以軍事屬前鋒親信部將急詣丹陽軍始定賊抵丹陽將出戰馬奮躍墜公於地傷股賊眾至軍潰公歿於陣和春走死蘇常相繼陷公餘兵保鎮江出戰猶小捷焉余於山東遇吉林兵將北還詢張公蹤跡言親覩公在丹陽南門十里牌赴水死云

記樂提督死事

方宗誠

咸豐十年七月二日英吉利犯大沽直隸古北口提督樂善死之先是八年僧親王奉

命駐兵大沽以堵禦英吉利法郎西諸夷九年五月大敗夷人於海口夷退聲言必報復是時鄭親王端華怡親王載垣戶部尚書肅順俱以戰守非計雖勝而愈恐傷主戰而陰令直隸總督恆福主撫許夷人由

續傳卷六十六

主

北塘入議和不設備僧親王亦以馬兵足恃有輕夷心使副都統德興阿駐兵新河以待之德興阿者前統兵江南不救六合致溫觀察紹原於死者也總督舉而用之初僧親王銳意欲固守以公勇悍檄調至大沽公至卽以關防交僧親王擇其卒願留者聽願去者亦聽於是願留者千餘人入卽閉營門誓死不去至是年六月夷船至由北塘登岸二十六日攻新河次日攻唐兒沽德興阿望風走

朝議屢遣大臣文俊恆祺往議和夷益驕許和以誘我而我兵和戰不決益怯七月二日夷人攻大沽時公守石縫礮臺擊敗之相持一日夷益進而我兵無後繼者礮臺及火藥局火起兵多受傷死公知不可守遂自刎投於河從死者副將守備各一人先是公以德興阿兵潰知夷必來犯請僧親王多發馬隊與之僧親王固留大營不可公死夷人氣張甚總督奉

命勸僧親王棄大沽退至通州海口全失夷人遂入天津至通州犯淀園入京師數月取和而去是役也夷去國越海數萬里入我內地守禦大將數十人惟公死守其地夷人敬之斂其尸歸於天津公治軍紀律嚴整初從勝保剿賊河南當咸豐六七年閒屢著戰功嘗由歸德追賊

至六安解固始圍後以勝保剛愎多者欲不欲隸其麾下旋以母喪回旗遂奉僧親王檄至海口而勝保軍遂不振云

論曰吾客保定適見夷人內侵及京師震驚

乘輿得力戰死者樂提軍及其麾下二人而已又聞夷入通州西倉監督貴倫玉潤自經死犯淀園內務府大臣文豐投水死員外郎泰清全家自焚死是皆可謂不辱臣節者因附著之

周天受傳

安徽通志

周天受字百祿四川新都人由把總於咸豐元年從向榮征廣西轉戰湖南湖北江南游擢都司四年從鄧紹良剿賊太平甯國帶兵赴徽州會合江長貴援剿賊於青石嶺追至青陽城下移營琉璃嶺賊來撲營大敗之尋調防石埭賊於崇覺寺五年在琉璃嶺嚴鎮等處打仗功列頭等肅清徽州克復婺源休甯石埭等城扼崇覺寺六年剿賊祁門追至涇縣南陵轉戰數月皆有功江西賊竄徽州休甯黟縣天受由南陵馳援解徽州之圍復休甯黟縣時涇縣復陷天受星夜回剿克復涇城因先登受頭等傷七年正月調回徽防二月賊復犯祁門婺源石埭太平均剿敗之一律肅清仍駐防石埭賊於崇覺寺七都一帶

續碑傳卷六十六

古

進攻陵陽鎮獲勝復竄黟縣祁門天受會同江長貴援剿均收復八年正月進攻南陵禽斬頗多時天受已累擢至福建漳州鎮總兵加提督銜

命幫辦浙江軍務總統諸軍轉戰浙閩尋因婺源失陷天受統師回剿力拔堅城擢湖南提督九年攻祁門克之援甯國擊退涇縣距賊解南陵圍再復婺源

命督辦甯國軍事十年三月江南大營失利賊匪分竄徽州天受援歙縣戰叢山關等處斃賊頗多賊竄撲甯國府城天受鏖戰數月糧梗援絕八月十二日城陷力戰陣亡

諭照提督例賜卹於甯國府城建立專祠其胞弟周天培上年江北殉節周天孚本年金壇殉節亦係堅守孤城力竭不屈一門忠烈大節凜然著於四川省城及本縣建周天受兄弟三人祠字尋

賜卹如例

贈太子太保銜世襲騎都尉兼一雲騎尉

伊壯愍公事略

吳棠

咸豐己未冬余權篆彭城下車之日徐宿士民數百呈請伊都護復出

勦賊詞旨危激儼如望歲余思箕畢殊情歡心難洽都護得民迺遽至此卽爲剴切詳請至再至三然事與心違議竟寢嗣是謁君見君狀豹修偉目光炯炯逼人論天下事深中痼弊其大端尤以愛民爲第一義實心折焉因得悉生平君姓何圖哩氏原名伊清阿字松坪吉林正白旗人也少孤家貧饒勇力以打牲爲業年十七補旗甲從征回逆張格爾凱旋補驍騎校有回民馬二橫行鄉里多不法一日馬掠婦人途遇君君素任俠直前呵斥馬憤鬪君掠殺之被議入獄長官廉得其情置

不論會選侍衛君入京充羽林從獵射虎

召對諭以原名不合清語改名伊興額旋擢三等待衛

乾清門行走君暇與燕京賢士大夫游折節爲學兼工書畫道光二十

一年英夷逆命君從軍兩浙和議成旋京旣與當道齟齬乞病歸閒居

七年咸豐二年粵西盜起武昌金陵不守徵兵吉林君感

國家厚恩又憫中原多故慨請從軍時大軍駐維揚賊另股竄江浦琦

帥授君偏師討江浦賊君至示弱不戰賊益驕君夜厲兵薄賊斫營入

斬殺過當沿江賊壘悉平事聞擢二等侍衛又以功擢頭等侍衛賊圍

和州甚急皖軍遠在廬郡莫能救君議赴援或謂無帥命不宜輕舉斥

曰均是王土敢分畛域耶悉軍進擊賊敗圍解君駐江浦三年賊不犯

六年擒匪圍宿州君由江浦率千騎援宿四戰四捷圍解賊奔頰上是

君駐師徐宿之始時頰亳蒙宿捻匪蜂起每股數萬窮肆焚掠民不聊

生君至擇要築營徐宿數百里得安耕穫屢豐年感人是深也其戰

功最奇者是年冬賊首王廣愛梁振貴聚匪張七家樓眾數萬議北竄

君聞報曰賊眾我寡宜乘初集急擊之時君騎調赴維揚七百祇存二

百餘騎配得步勇二千君選精兵銜放疾馳掩入賊壘立獲王梁二逆

餘賊來救君率騎持鳥鎗橫突賊陣賊匪遁事聞旋授正紅旗蒙古副

都統七年夏賊酋李月由三河尖北竄李素慄悍善鬪君堅守不與戰

第斷其掠糧之路先是君每敗賊賊中婦女悉不究問故賊避君而眷

屬不避也李黨陳保元事母最孝君稔知陳母居里招至營使諭陳降

陳猶疑懼君卽單騎往受五千人降陳感泣願效死李月勢孤宵遁君

追至大陳集獲之餘賊平計十日而巨寇殲焉事聞

賜額圖渾巴圖魯勇號餘績如破龍山燕家坊等賊圩解頰州蒙城圍

不勝枚舉賊中相戒不與伊都護遇爾時瀚北悉定八年賊首劉添祥

等由六安北竄眾數萬君以孤軍無援少挫退屯蕭縣賊不敢逼會豐

續神傳卷六十六 五

邑陷君被議削職賊遂竄入山東蹂躪徐宿殆徧九年春君復起賊竄豫疆君率騎千三百援豫至商水與賊遇賊數倍我列車陣以拒君分兵繞賊後賊拒前則後擊拒後則前擊賊殊死鬪鏖戰閒賊忽呼曰伊都護兵至矣蓋始不知爲君也賊遂潰公謂諸將曰子廢斥半載賊眾至數十萬披猖極矣如天之福幸戰勝當痛勦以振軍威於是窮追三晝夜歷沈邱項城至太和縣境殺賊二萬餘諸賊聞風薙髮逃散巨魁趙浩然等議投誠受降有日矣然君之戰商水也總兵邱聯恩同日在舞陽戰歿時豫境徧賊而舞陽去商水二百里及君戰勝舞陽賊亦道當事以聯恩故劾君又解兵柄距君復起三月耳自此賊益肆擾掠無閒日君以蒿目時艱積勞成疾咸豐十年夏乞休罷歸抵京師適英夷北犯留京助守和議成僧邱南征奏請君隨

賜六品頂戴旋

賜三品頂戴

敕辦徐宿團練初君充羽林時最嗜孟子每藏卷摩撫折其四角十年十一月君自濟甯南下道經鄒縣謁孟子廟並呼諸將羅拜曰予平生服膺彼丈夫也我丈夫也數語朗誦一過便可啟發志氣十二月朔君抵徐時余任徐州道相見謂予曰今日兵單餉絀賊勢鴟張大非昔比予滿洲世僕受

續碑傳卷六十六

去

恩深重惟有勉竭心力以濟時艱或人定勝天耳君舊部曲或歿或遷多不隸麾下所將五百騎未經戰陣增募騎勇尚需訓練君意俟僧邸軍至厚積勁旅且撫且勦賊聞君來亦有議納款者使天假之年以君威望素著從容籌辦亂詎難哉乃賊竄曹單東境近接畿輔北路爲重十一年二月一日與徐州滕鎮統騎二千裹五日糧北援初七日追賊至東平我軍雖饑困戰猶迭勝賊另股擾我後軍稍卻滕鎮前督師馬蹟歿滕鎮名家勝亦君舊部曲屢立戰功者君聞滕鎮被圍疾揮百餘騎沖入賊中屢索不得突圍復出從騎潰隨者十餘人耳賊麕聚復圍君數日君往來衝突斬殺無算矢盡力窮竟戰歿焉徐宿紳民招魂野祭不期而會者數萬人相向而哭淚血模糊每道及君雖婦孺亦吞聲君與士卒共甘苦而軍律最嚴有取民間一芥者斬故民尤感焉天子篤念勳勤復君原官

敕部議卹

諭允在江東皖豫建立專祠以妥忠魂旋奉

特旨賜諡壯愍噶君之志未終君之名萬古矣盜賊充斥瘡痍滿目孰是繼君而起者跋子望之

伊松坪都護事略宗稷辰

咸豐十一年二月皖捻分道犯山東副都統伊公與徐州鎮騰公家勝統兵擊之於汶上東平連日殺賊甚眾益猛進初八日至臥虎山風靈忽作急勒兵退至楊柳集伏起被困皆力戰以死僧帥侮趣戰急喪良將大慟事聞

上悼卹復其官南自徐宿西至汝濰北至泰兗沂濟吏士軍庶皆痛惜之公姓和特弩特氏初名英升額

宣廟命改名伊興額字松坪蒙古正白旗人也舊居吉林松花江南狀貌修偉少日侷儻好射獵以能殺虎稱於時從征回疆屢拔偏校以勇幹選三音哈漢子好爲

乾清門侍衛遂隸滿洲道光中海疆有事從揚威將軍出征師中輟而還鬱鬱不自得數年以疾辭職歸吉林仍射生山積聞將以韜晦終焉迨咸豐初粵寇入楚擾江南公奮然起請自備資糧率所部隨勦

朝命壯其請許往以一旅駐江浦時逆眾連陷巢縣和州含山踐我營壘欲由烏江北犯公率二百騎迎擊於石磯橋大破之尋獲勝於柳樹壩進擢二等侍衛某年破江上九洲洲功最顯頭等侍衛尋調赴河南

軍復留勦宿州捻寇奔馳三省之間數載以濰溪口殺賊功加副都統銜七年偵知捻首李月兒約范宗陵謀北竄迅擊之於張家七樓斬宗陵月兒遁往永城東南王家渦子築圩屯聚十萬公逼攻三晝夜賊幾遁有謀告者督騎聞道出賊後禽月兒其旗屬陳保元王有功畏服先後來降解散甚眾

特賞額圖渾巴圖魯授正紅旗蒙古副都統八年正月駐軍臨渙近賊圩夜密捕長髮者予賞賊不敢侵及移營丁辰集小黃旗黠賊謀劫公集北集南屢移不得所在乃出奇兵攻薛家湖賊巢公腰受鉛子傷血流滿鞞忍痛力戰破其圩奏入

賜頭品頂戴未幾因豐縣失守奪職然濰口拒劉家祥單騎救民數萬渡濰水頌聲載途豫境更倚以爲重及商水破五旗大捷

上嘉其忠勇由幫辦三省勦匪事宜並開復原官督辦河南全省軍務方謂旦夕將大用而飛語中傷尋解兵柄公卽謝病回徐城徐宿士民以公去賊熾叩

壘欲由烏江北犯公率二百騎迎擊於石磯橋大破之尋獲勝於柳樹壩進擢二等侍衛某年破江上九洲洲功最顯頭等侍衛尋調赴河南軍復留勦宿州捻寇奔馳三省之間數載以濰溪口殺賊功加副都統銜七年偵知捻首李月兒約范宗陵謀北竄迅擊之於張家七樓斬宗陵月兒遁往永城東南王家渦子築圩屯聚十萬公逼攻三晝夜賊幾遁有謀告者督騎聞道出賊後禽月兒其旗屬陳保元王有功畏服先後來降解散甚眾

特賞額圖渾巴圖魯授正紅旗蒙古副都統八年正月駐軍臨渙近賊圩夜密捕長髮者予賞賊不敢侵及移營丁辰集小黃旗黠賊謀劫公集北集南屢移不得所在乃出奇兵攻薛家湖賊巢公腰受鉛子傷血流滿鞞忍痛力戰破其圩奏入

賜頭品頂戴未幾因豐縣失守奪職然濰口拒劉家祥單騎救民數萬渡濰水頌聲載途豫境更倚以爲重及商水破五旗大捷

上嘉其忠勇由幫辦三省勦匪事宜並開復原官督辦河南全省軍務方謂旦夕將大用而飛語中傷尋解兵柄公卽謝病回徐城徐宿士民以公去賊熾叩

闡請還鎮濰溪

密詔令公強起固以篤疾辭致有革職回旗之

命即日就道抵京閒住僧邸保薦

賞六品頂戴從其軍甫出都徐宿人請公鎮徐者奔愬不已

上聞之加三品頂戴

敕辦徐宿民團事務到徐之日父老婦孺喜相告曰我大人真來矣居

亡何奉帥令援勦東境會滕公軍至東平進兵太驟遂及於難嗚呼豈

非天哉

上既予優卹兼

允徐宿永城汶上等處皆爲建祠濟甯州民亦欲祠公有夢公已爲城

隍神者精忠至誠天人咸格而卒莫挽於命數是理之不可解者也公

用兵神速純以心運動合古法紀律明肅不營私利信賞必罰得士卒

心取民間一秉稗束藁卽斬以徇雖烈風驟雨無敢入民居民愛戴之

如父母故所至民悅所去民思其戰伐如在渦河一旬平七圩在桃園

一日破十二營在新修河一夕破沈沂幅匪萬計名蹟不勝書性儉樸

無他嗜暇親書史好爲壁窠大字惟過剛忤物恃勇罕退致不免於責

災生於嘉慶十二年二月二十四日年僅五十有五昔唐韋顛博采武

臣毅勇忠廉載之別錄稷辰竊取其意聞公勇義冠時未盡其用以衛

民生慘死疆場深爲天下惜爰略記其行事志勿誼焉

饒莊勇公別傳 李元度

饒公廷選字枚臣閩縣人少涉書史倜儻多大略未冠入伍道光十

一年張丙反臺灣以千總隨將軍瑚松額東渡提督馬濟勝號知兵嘉公

材致之麾下獲賊多

賞戴藍翎十四年遷守備十五年嘉義沈知等煽亂總督鍾祥以公習

臺事檄之往事平

賞換花翎歷權各營游擊所至兵樂而民安之總督吳文節文鎔以曉

暢軍事疏薦二十一年七月海上事起公統精兵七百馳扼海澄二十

四年三月總督劉韻珂檄赴馬巷禽匪徒陳鈕等是時水師提督寶振

彪治水軍有聲公以陸路營將隨之出洋首先擊賊船禽其魁寶公壯

之二十五年擢都司二十八年擢漳州左營游擊成豐二年調署中營

游擊漳俗勁悍一言不相下則聚族而鬪訟之官必互誣其鄉之最富

者爲首官提兵下則焚村以示威必各飽所欲而後息良懦者苦之而

文武兵役及其鄉之秀民則無所不利公嚴賊所部親入鄉召父老反
覆曉以利害使縛獻真犯置諸法林連者蒯雪之守令戚公誠無異議
故漳民之戴公也如慈父母焉三年三月詔安械嗣官治之不服勢張
甚總兵曹三祝以公及龍溪令趙印川得兵民心使往是時潮州小刀
會轉相誘結浸淫漳境窺公之出也潛伏城中四月初十日倉卒起
鎮道皆遇害所部卒郭連城護公眷屬出公聞變疾馳歸已而偵知會
匪羽翼徧諸鄉良善者亦爲所脅乃獨攜健卒葉騰蛟等聞道趨郡城
半途賊圍而蹤跡之有大姓某於眾中目公指謂羣賊曰此吾讐也無
與諸君事吾將甘心焉遂翼公至其家再拜賀曰吾知公公再生吾等
亦再生今郡城已陷公獨身歸死何益請爲公號召良民之脅從者脅
從者聞公在必反正城中宜有應者賊不足平矣俄頃集千餘人公帥
以行賊不敢逼始賊之陷漳城也與城中百姓約無相害百姓隱忍安
之以待公至已而訛傳公及趙公爲賊所得驚走相告向賊索二公賊
力自無之眾憤曰是必旣殺之而誑我也詎且闕洵洵不可遏賊遂遁
十七日公以鄉團至援賊復大集圍漳城數日公嬰城固守時時出奇
勝之大小數十戰賊乃潰總督王懿德檄公護漳州鎮總兵外勦內撫

續神傳卷六十六

九

期年悉平四年三月擢貴州安義鎮總兵旋護福建陸路提督五年三
月粵逆陷廣信浙江危甚王懿德檄公馳扼衢州適甯紹台道羅忠節
澤南以楚軍復廣信賊知三衢之有備也從徽州遁浙境以安六年逆
酋楊輔清圖踞廣信以窺江浙率數萬人繇吉安出永豐倍道行陷廣
昌南豐新城瀘溪等縣疾若風雨無敢當之者當是時江西學政廉兆
綸督廣饒防務委樂平紳士石景芬統三營駐貴溪聞瀘溪陷景芬提
左右二營迎之於金溪賊緣山出口塞八月初四日襲貴溪中營郭
守謙以數百人誓死血戰沒景芬回援初五日潰於弋陽時廣信守兵
數百聞風皆潰署知府沈文肅葆楨從廉兆綸籌餉於河口初六日單
騎歸城無居人懸重賞募士無應者惟與厥配林夫人枯坐待盡而已
公時在玉山得告急書慨然趣治裝曰賊得廣信則玉山不可守是無
江浙也東南大局視此一舉願諸君努力眾曰唯然夫役盡逃礮械鉛
藥居後則無以爲戰從水路又舟膠不能下初七日賊謀入廣信城漏
二下舉火爲號連葭葦棟光燭數十里達且大雨如注火始滅初九日
雨益甚山水驟發河流漲丈餘公額手慶曰天贊我也師遂下前隊頃
刻達沙溪去郡城五十里初十日公至方入館忽城中鼎沸公躍馬出

有負裝且呼且走過馬前者立斬之眾然後定城中惟倉有餘米油鹽
薪蔬闕如也卒或至暮不得爲炊無譁者是日賊軍城西四十里之太
平橋十一日厥明互非山賊幟如林前者按隊後者立營部伍整齊望
而知爲劇賊始謀之入廣信也以空城歸報賊喜不以爲慮故避兩於
河口興安凡二日及逼城乃大驚以爲將軍從天下也盡殺前謀之言
空城者而氣已沮矣公所部僅千餘人背城擊賊輒勝鄉民聞郡中有
兵喜爭擔負冒險入犒軍十三日賊大至長圍合接濟斷巨礮環轟子
下城中如雨隨營文員懼脅諸將請於公曰吾屬奉檄守浙境廣信存
亡非吾事也今賊將以地道轟城兵少不能支城旦暮破將死之乎且
使廣信幸存賊以全力東趨兩浙瓦解誰職其咎宜潛師夜出退保浙
境遲則無及矣公部將守備畢定邦賴高翔怒曰君等怯何如勿來今
我在城中賊不知我虛實以爲我能援廣信後路必有所恃彼舍廣信
趨浙江恐前後受敵必不敢出此若棄城遁我在虜目中一一可數情
見勢屈追殲立盡尚何浙境之可保耶明日當決一死戰諸君於城上
觀我破賊十五日定邦高翔開城出大呼決戰自晨至日昃毀其長圍
軍聲大振是夜守令欲求觴酒豆肉爲公慶中秋不可得並巡城燈燭

續傳卷六十六

三

無之時月明如晝星河斂耀倚堞望賊壘悄然無聲公命去刁斗與沈
公澹茗清談飄飄然作廣寒宮闕之想不知身在孤城中也十六日我
師壓賊營賊不敢出次日賊遁事聞

賜號西林巴圖魯閩浙大吏素不嫌於廣饒督防者聲以嚴檄召公歸
詎諱備至旁觀咸爲不平公晏然俟接防兵到乃行曰吾不得不爲

國家疆土百姓性命屈也七年六月調補衢嚴鎮總兵八月會同徽師
復婺源八年逆酋石達開以撫建賊五十餘萬傾巢出公從玉山飭參

將胡定國援廣豐而自統所部馳歸衢州公至而賊亦至賊乘驟雨盡
毀護城營壁以地道撼城城圯者三卒以堅禦得完凡九十餘晝夜目

不交睫浙江巡撫晏端書以公失所屬三縣又未能速解衢圍疏請奪
職疏出而圍解江常開三邑亦次第復奉

旨開復原官旋授贛南鎮總兵會閩浙總督王懿德檄公赴汀州病甚
未能進遽劾公奪職然

顯皇帝知公忠爲留贛南鎮缺九年正月病痊勦平白沙溪口土匪奉
旨仍補贛南鎮兵部侍郎曾文正國藩奏調赴江代沈公葆楨防廣信
從民望也已而楊輔清踞景德鎮公率平江等營扼之於浮梁十年逆

酋李秀成陷浙江公繇江援浙四月復洧安奉

旨節制在防各軍五月授浙江提督杭州復後賊又來攻會同將軍忠壯公瑞昌巡撫王壯愍有齡擊卻之並復餘杭十一年九月進剿諸暨王公以省城危急飛咨回援二十九日至杭州時郡邑皆淪於賊數百里內無援師鄉民相率入城填塞閭巷糧爲之竭公舊部僅漳勇數百並江石所接統楚軍二千餘則他帥就地收集金陵潰卒事急以付公者又皆飢不任戰困守七十餘日米粟盡幸牛馬牛馬盡掘草根剝樹皮公惟以忠義涕泣激厲之至飢踣載途無叛者十一月二十八日城陷巷戰手刃數賊死之年五十有八公性不嗜殺有以威克厥愛規公者公曰有罪不敢赦至於非其力之所及故殺之以示威吾不忍也善知人如畢定邦賴高翔皆拔諸儕伍之中並以戰功顯旣而畢賴改隸他軍不竟其用以殞而公亦有思用趙人之歎矣

贈太子少保

子諡莊勇

賜祭葬世襲如例入祀昭忠祠並於廣信府建立專祠以副將畢定邦游擊賴高翔附焉長子堃襲職次子新同治三年舉人三子霖幼四子

續碑傳卷六十六

三

鈐甫三歲殉公難於杭城

贊曰沈文肅之守廣信也城空援絕誓身殉而已得公投袂赴援江浙並受其福當是時公義聲震天下文肅亦用此發聞於時而閩浙諸大吏爭警警公且下石焉烏虜獨何心哉余嘗晤公建昌握手談天下事甚快公殉浙難屢擬爲公傳不果得文肅所爲公狀急錄而存之而文肅亦不可作矣悲夫

忠壯公瑞昌傳

陳繼聰

瑞昌公字雲閣滿洲鑲黃旗人咸豐四年粵賊北犯公以副都統從僧

忠親王率所部戰高唐連鎮開所嚮多捷及逆渠李開方就俘論功

上授公杭州將軍七年冬抵任適賊屢出沒徽州甯國浙境戒嚴公益

操練士伍不閒寒暑十年二月逆酋李秀成由廣德竄犯杭州巡撫羅

壯節斂兵入城賊遂攻圍北門人心洶懼公知賊無後繼斷難持久分

旗守駐防子城二十七日賊從清波門地道入文武將吏或死或走惟

駐防城如故賊悉力攻之公率副都統來存協領傑純舉礮擊斃賊

無算又聞提督張玉良自江南大營來救已在湖州公乃募人突圍出

請援兵有杭州人王元者牧馬旗營應募齋書從水竄出直造張提督

營提督閱書云爾滿營數里地恐且夕不保我將蜀軍無多往亦不濟元曰賊皆烏合雖多不能戰俟其未定擊之可大克省城復軍門勳名冠世矣提督領之飲以酒元曰瑞將軍望救如渴我食奚以下咽哉且奉命來乞師而不得萬一滿營不保元何顏生於人世遂大哭聲徹於外提督感其誠復偵知駐防城堅守狀於是麾其軍行三月二日前鋒抵艮山門踰城而入時公因援旅不至與賊約決戰於錢塘門之校場賊悉精銳列陣以待公命來都統傑協領督騎衝之滿人婦女皆禪執旗助戰鼓聲震天自辰自午馬隊馳突數次賊陣動又望見外城上插張字旗疑為總統張國樑救至大驚滿軍乘之賊遂敗而棄省城以走

公告捷於朝

上嘉歎晉頭昂頂戴總統浙江軍務是月巡撫王壯愨自蘇州至公與之繕城郭籌善後復以錢塘湧金清波三門皆瀕西湖募練水軍以壯聲勢已而金陵大營潰賊陷蘇常踞嘉興分黨進逼下游逆氛日棘浙省皆係客將潰兵驕而怯戰所過騷擾閭里公知事不可為憤懣發病時時閤中臥不復能治軍事矣明年金華嚴州相繼失守九月賊由富陽餘杭直犯杭州眾數十萬合以重圍外援皆不得入十一月二十八

續碑傳卷六十六

日省城再陷公又欲守滿營而壯士多傷亡不足以拒賊乃集八旗將校誓死報

國量人多寡家授以火藥相持至初一日滿城亦破公在署中先舉火闔營次第火煙燄四起同日死者自公與杭州副都統關福在籍江蘇糧儲道赫特赫訥以下由翰林出為江南淮海道黃旗人道光壬午進士江蘇解州人二月杭州陷由翰林出為江南淮海道黃旗人道光壬午進士壯德治明年十二月杭州陷由翰林出為江南淮海道黃旗人道光壬午進士納皆自男婦三四千人候補縣丞襄辦滿營文案涇縣沈榮恩亦殉難而王元以乞師之忠為張提督所重甚見信用洵升都司己於是年六月戰歿於長安鎮事聞

上哀公之烈卹典甚優

子諡忠壯

命建專祠以諸死事者祀焉

論曰咸豐庚申春杭城之失而旋復也雖由張璧田軍門援旅之功然非瑞忠壯公戰於內以挫其鋒外軍即至未必收省垣於指顧也迨至辛酉冬杭州再被則駐防之精銳已略盡又困於饑公申令誓眾力不能戰義不肯辱遂縱火自焚也闔營官兵眷屬無一人陷賊者報

國豈不烈哉
果毅公傑純傳 陳繼聰

傑純公蒙古鑲白旗人官杭州駐防協領洞曉戎律深得士心歷任將
軍皆倚重之咸豐十年春省城陷巡撫羅公溢死將軍瑞忠壯公亦欲
自剄公與副都統來存言賊以偏師入犯必無後繼可力守駐防城以
待外援忠壯乃止命公同來都統督軍登陣公身先甲士露宿壁壘間
巡警最嚴賊挑悍者來攻公率旗兵力戰滿城婦女亦捻矛刺賊賊憤
甚屢攻死傷枕藉終不能克乃欲掘地道王家蕩埋火藥以轟城適六
品軍功錢塘人李德昌偵知之遣軍功傅聚松潛至延齡門投書告將
軍將軍使公豫防地道之賊斬其先入者數人擲首級營門外賊益喪
膽會提督張玉良救至公遂怒馬突出闔營從之與外兵夾擊賊披靡
遁去事平敘功擢甯夏副都統旋改乍浦仍留佐瑞公軍明年九月賊
大至城中主客兵勇尚數萬人巡撫王壯愨議主堅壁以守賊遂合圍
絕我餉道時公率部下及所募土勇列礮船結水營湧金錢塘兩門外
用勇目王應棠計分防西湖節節設卡賊眾雖盛不能驟逼城下沿南
山來者公出師禦之頗有斬獲已而兵士皆困於饑公殺一馬一牛則
籌分之必徧得豆一斗劑分之必徧故土感激無叛志相持月餘賊已
掠得小舟日與水軍戰於六橋上下一夕賊據湖心亭礮船往爭之不
得水營遂潰應棠為賊所殺十一月杭州再破進陷滿城公巷戰死之
子婦鈕祜祿氏赫舍哩氏孫崇綸崇勳再勝女孫庚姑辰姑僕洪邦興
僕婦王氏吳氏楊氏婢增祿桂香等十三人皆舉火自焚同日殉焉而
德昌聚松督理鄉團至是亦與勇目俞廷鳳死於難公積面美髯儀觀
甚偉平時能弈棋詠詩自許儒將及臨陣挽鬚持大刀策騎馳突奮不
返顧杭人無不壯之長子訥蘇鏗先戰死公收其尸具棺殮之笑曰汝
先得所歸矣次子城被逸出回京呈闕門死事狀得

續傳卷六十六

子諡果毅
旨優卹

論曰平浙紀略言辛酉賊再犯杭州將軍瑞公已病甚傑果毅公屢欲
出戰副都統關福堅持不發兵蓋都統亦與王巡撫主守之意同也若
使當事能從公言合滿漢之軍士令公督之背城一戰人知必死城圍
或可立解惜乎以公忠勇徒領水軍一隊防守西湖雖能出師輒捷究
亦小挫賊鋒卒至糧絕兵散公既殉以全家而巡撫與都統亦罹於難

豈不哀哉

陳威肅公別傳

李元度

陳公大富字餘庵武陵人起行伍道光三十年以外委從提督向公榮出師廣西戰永安解桂林圍回援長沙追賊武昌轉戰金陵常爲軍鋒

淳擢常德協都司

賜孔雀翎咸豐七年從浙江提督鄧公紹良復甯國屬之灣址黃池晉游擊尋援浙江剿賊金華處州除參將賊竄石埭太平皆擊走之又從復涇縣拔南陵擢副將八年十一月灣址師潰鄧公死之公左次南陵明年夏四月賊犯南陵力禦之賊百計環攻不得逞十年三月圍始解計苦守經年矣

顯廟嘉其績除皖南鎮總兵五月僞侍王李世賢圍甯國分黨攻金壇及南陵當是時湖南提督周公天受守甯國高州總兵蕭公知音參將周公天孚等守金壇公仍守南陵賊眾數十萬我軍勢不敵日夜血戰各死守待援七月十八日金壇陷賊屠其城周公天受見事不可爲乃盡出甯城中兵民數萬人令各逃生獨誓以身殉甯民扶老攜幼走南陵投公公開門納之八月十二日甯國陷周公死之賊圍南陵益急城

續傳卷六十六

語

中食且盡餓殍相屬公自分死矣以忠義激厲軍民皆誓弗去夜遣壯士縋城出求援於水師前後數輩爲邏賊所獲最後乃得達時福建提督楊公岳斌統水師而欽差大臣兩江總督曾公方駐祁門亦檄水師援南陵楊公投袂起九月水師次縱陽會大雨揚帆泊魯港聲言攻蕪湖而密部署各營扼要隘且結浮梁以俟十月四日水師驟起登岸出賊不意盡燔港左右賊屯呼聲與江湖聲相亂公方乘城見圍賊爭馳赴魯港眾囂且亂拊髀曰援師至矣乃枵腹出城夾擊憤甚手大旗衝陣十盪十決追殺十餘里與援師會計殲賊萬餘撲水死者無算圍立解是役也賊乘屢勝之勢視南陵掌中物氣驕甚圍攻六閱月竟爲我水陸軍所燬公於是再守南陵矣城中兵僅存皮骨民尤甚草根樹皮食盡雀鼠爲空楊公船粟來哺權聲雷動公擬繕城垣固守楊公謂形勢不便乃帥師赴上游百姓從者十餘萬屯東流十一年正月公會水師復建德二月李世賢率黨數萬竄景德鎮江西大震乞援師公帥四千入自建德往援賊恨公刺骨知公勇難敵也思以計陷之盡伏悍賊於牛角嶺柳家灣回龍嶺等處距鎮三十里公至湖田不見賊將還賊渠忽率馬步隊繇鎮南雙鳳橋竄至李村誘官軍公帥師迎擊賊不戰

退次日大霧賊分黨潛逾橋伏各營左右日高春霧稍斂公率大隊躍馬直前參將田應科等繼之賊突從鎮東抄出師稍卻伏賊盡起公挺矛力禦礮洞左乳血如注仍裹創決戰賊從開道襲焚我營應科及游擊蕭傳科胡占麓都司胡鳳雛熊定邦吳定魁千總羅廷材等皆戰死公見營中火起下馬北向叩首曰臣力竭矣投李村河而死

詔贈提督

賜卹如典例

賞騎都尉兼一雲騎尉

子諡威肅南陵建專祠應科鳳凰廳人

贈副將 子諡果毅傳科占麓與應科同里定魁字玉堂長沙人鳳雛等佚其里籍各照本階加等議卹並祀南陵專祠

贊曰軍興楚人以善戰聞善守者推陳公為最公守南陵始被困經年繼六閱月賊視前尤眾公以葺爾城當十萬方張之寇羅雀掘鼠忍死待援卒以此名聞天下方事之殷自謂無生理矣乃不死於南陵卒死景德鎮烏虜求其故而不得者命矣夫

石剛介滕武烈熊勤勇公別傳李元度石公玉龍鳳凰廳人充道標練勇道光中從征崇陽亂民鍾人傑及乾

州逆苗石觀保新甯匪首李沅發所至有功賜戴藍翎補外委咸豐元年隨提督向公榮解桂林圍遷把總尋繇長

沙追賊至湖北敗諸洪山塔抵江南敗諸七甕橋進攻高瀆公皆為前鋒俘賊不可殫數擢千總四年金陵賊自仙鶴門出竄高資下蜀街公

身先陷陣擊走之又同勝賊於黃池擢守備移攻蕪湖五年五月克之晉都司六年十二月從大軍克甯國城敗援賊逐北數十里公手刃數

十賊晉游擊當是時領涇防者為總兵秦如虎以憂歸浙江提督鄧公紹良最重公言於浙撫晏公端書會疏請以公代

詔許之以游擊充統將異數也公感知遇戰益力明年補建昌營游擊五月克復灣址及黃池又復南陵破賊於三里店除參將

賜孔雀翎九年三月敗賊萬級嶺追勦至卓村斬賊目十餘人詔以副將用十月偽忠王李秀成大舉犯涇防眾十數倍公迎擊藍山

嶺敗之手奪大旗而賊至益眾公擲旗怒馬突陣殺數十人賊圍之數重身受十餘創力竭死之事聞

續傳卷六十六

五

詔贈總兵加提督銜

賜卹

賜卹

子諡剛介無子以弟子某襲世職

滕公家勝字謹亭乾州廳人起家鎮溪營戰兵咸豐二年出師廣西追賊至湖南北轉戰及江甯提督向公榮壁紫金山六戰皆捷公並從又從克高瀘太平及上方橋秣陵關所向有功歷絲哨官充統將尋渡江進剿鳳陽臨淮等處收復郡縣以十數敢戰出諸將右在軍中十年洊保總兵加提督銜

賞換孔雀翎

賜號濟特固伊巴圖魯九年奉

詔援剿淮徐隸欽差大臣袁公甲三戲下時淮北河南莠民稔亂曰捻匪公屢戰皆捷袁公特疏薦

詔授川北鎮總兵尋以捻匪披猖留軍未赴任是年十二月有

旨調徐州鎮明年正月抵任二月擒匪犯山東當是時科爾沁親王僧格林沁公帥蒙古兵剿賊都統伊興額公爲翼長夙重公威名檄赴山

東堵剿公投袂起與伊公大破賊於東平州汶上縣殲賊盈千追擊二

十餘里將旋師忽援賊大至寡眾不敵歸路斷公駐馬謂伊公曰男兒

死耳當各努力多殺一賊卽爲天下除一害也伊公曰然併力決盪當

者輒死手刃數十人親卒喪且盡力竭並死之王以狀聞

文宗震悼

贈提督

賜祭葬

予諡武烈

賞騎都尉兼一雲騎尉世職未幾當事疏稱公與伊公轉戰徐宿間忠

勇有紀律深得民心請於死事地方合建專祠

制曰可

熊公天喜永綏廳人起軍校咸豐元年出師廣西敗賊於慶遠授鎮守

把總二年二月賊犯桂林力戰解其圍賊遂繇全州涉黃沙河衝永戒

嚴南撫駱公檄防郴永八月長沙被圍公率隊來援十月十九日賊遁

公追賊至湖北十一月燬洪山賊壘二十有八三年敗賊於九江擢永

順協千總四年敗賊於廬州擢長沙協守備時賊踞廬久城以外屯壁

相望公深入決死戰時有斬馘五年三月攻得勝門燬賊十餘營右額傷大帥嘉其勇奏授都司八月援柘皋

賜戴花翎十月廬州復公首登城晉游擊

遷副將十月移師鎮江復其城

詔記名以總兵用會壽春鎮闕員得

旨命在軍署理未幾卽眞帥師勦東路十年正月敗賊於湖州及下關

七里洲時杭州陷公帥師赴援復其城以次徇西安長興皆復三月回

常州駐丹陽閩月江甯賊悉黨來犯眾十餘萬公與湖北提督王公俊

力禦之相持一晝夜所殺傷相當然我軍止二千人賊至如螳王公力

竭落馬公力救之縱橫血戰賊當者輒靡而眾寡懸殊左右馳突莫能

出遂遇害時二十九日也狀聞得

旨贈提督

賜祭葬及世職入祀昭忠祠

予諡勤勇

贊曰古稱山西出將湖以南不與焉自嘉慶初苗匪底定奏設三廳鎮

算始成重鎮提刑傅公又舉屯政練屯兵七十年來鎮屯兵稱勁旅將

才往往出焉三公之所成就卓卓如是地固益以人重哉予嘗周歷五

筆見叢山刺天溪流箭激風氣特剛勁殆不後北方之強云

滕提督傳陳作霖

公諱家勝湖南乾州廳人也有勇略初爲鎮算鎮兵隸游擊傅振邦麾

下咸豐二年粵寇圍長沙總兵鄧紹良率眾入援公以敢戰知名爲隊

長三年隨大軍下江南戰屢有功五年淮北盜起侍衛伊興阿奉

詔勦撫檄公爲前部往來徐宿間每戰輒先練壯士五百人爲親兵臨

敵時公執旗前引令五百人沿途伏塵留數十人誘賊賊易其少輒墮

伏中然性喜深入主帥屢戒之不能改也嘗獨追賊至靈璧傷還八年

總兵傅振邦駐徐州公舊帥也復徙隸之時公已存保至總兵記名提

督矣蒙亳間有畢家圍者羣盜出沒之所盜魁韓狼子等咸在公攻之

急羣盜求救於張濬張濬者據鳳陽之賊屢以乞降啗官軍者也其妻

曰柳三娘嘗往來軍幕間濬詭請於勝帥曰畢家圍諸豪聞宮保威名

欲降久矣而傅營攻之急恐阻其自新之路請諭止之勝帥重違其意

飛檄往傅公欲從之公憤然曰請賊兇狡未經大創何所畏而乞降若

舍之是養虎貽害非良計也擊之便傅公然其言限三日公親冒矢石
二日克之誅狼子等當是時皖北略定惟鳳陽未下傅公欲會勦勝帥
不可傅公遣公屯張家溝以逼之漴縱黨四掠公斬其游騎勝帥禁之
不止自是漴眾不敢東出泗州人倚爲保障多運米麥以饋軍故度支
雖絀而公營有贏糧焉十年勝帥以憂去左都御史袁甲三代之檄公
會勦漴猶陽乞撫袁公令總兵張得勝誘之出公遇諸途數其罪誅之
遂克鳳陽而還而練總苗沛霖驕橫如故也公欲乘勝勦之會伊帥復
至徐諸寨多殺豪自歸沛霖勢窘甚公遣人諭以禍福沛霖欲降而未
果十一年山東寇熾公隨伊帥還救賊遮道公破走之明日又戰於東
平之臥虎岡被圍不得脫死之伊帥聞而馳救亦陷陣死皖北民間之
無不流涕

論曰皖北爲捻逆淵藪自勝帥以招撫爲功諸將雖遇賊不敢擊惟公
滅韓狼誅張漴毅然獨斷有古名將風焉乃或以輕敵嘗之則是畏懦
退縮者反得借辭於持重哉

忠節十四

蔡東祥傳

湖陰圖志

蔡東祥世業農咸豐四年從水師隸李成謀營積功保千總加守備銜七年五月營官牌夾賊船上駛成謀遣所部追之會大風舟入湖口為賊所抄不得出時東祥領長龍戰艦一偃旗偽為賊須與風止急槳貫賊陣而出賊覺追之不及是役也失長龍戰艦五舢舨十三將弁死者二十一人而東祥舟獨完由是知名十一年隨成謀剿賊安慶旋改隸黃翼升軍攻克池州復銅陵及無為州同治元年隨大軍克金柱關襲賊東梁山復蕪湖累保副將加總兵銜

賞花翎加雄勇巴圖魯名號是年戰歿嘉善之夏湖口照總兵例

賜卹從祀蘇州及長沙府城昭忠祠東祥勇決有謀其勦賊安慶也時水師屢挫賊見水師輒爭出我師氣益索東祥請易戰艦白旗為紅旗成謀從之賊見紅旗疑為援兵方駭愕東祥急率屬馳之賊大敗斬賊無算軍威由是復振弟渭川亦從水師積功保總兵同治六年卒於軍

陳壯節江壯節蕭壯節三公別傳

續碑傳卷六十七 李元度

陳公明志字澹如武陵人少入伍充湖南提標戰兵拔外委道光二十二年出師廣東補把總湖北鍾人傑作亂奉檄征崇陽以功

賞六品翎頂稍遷辰州營千總二十九年李沅發倡亂新甯公進勦有

斬馘功擢桂陽營守備遂署常德協都司明年提督向忠武榮出師廣

西以公為營將時賊勢陸梁官軍當者輒靡楚兵至連日與賊戰皆捷

而公尤驍勇嘗大呼躍馬陷堅陣手梟賊酋於馬上軍中壯之敘功

賞換花翎咸豐元年春勦賊金田村大黃江公皆在專有功會感瘴癘

得疾楚軍中病者三百有奇欽差大臣李文恭星沅檄公領病軍回營

休養病痊公赴桂陽任三年向公充欽差大臣督辦江南軍務奏調公

赴軍前領乾州鎮遠河溪三營兵與賊轉戰數月四年補承順協都司

五年遷廣西提標游擊帥勦蕪湖大捷擢廣東雷州營參將六年奉

檄進剿丹陽破賊數十壘斬級數百以功晉副將會官軍進駐紫金山

戰事方殷檄公回大營充總理營務處五月十七日賊大舉來犯公帥

潮雷各營弁兵奮力迎戰殲賊無數血濡袍袴皆赤而賊來益眾公激厲士卒血戰三晝夜十九日力竭死之年三十有七事聞

詔貶副將例從優

賜卹

敕祀昭忠祠

賞雲騎尉世職

子諡壯節

江公忠信字誠夫新甯人少駢弛不羈饒膽力咸豐二年族兄忠烈公忠源帥楚勇赴廣西助勦公年十六從行以獲悍數犯軍令忠烈將斬以殉眾為乞免及遇賊驍捷敢戰常為軍鋒攻永安州時楚勇壁城南賊悉銳來撲公斬數級以獻敘外委嗣隨忠烈援長沙戰湖北解江西省城圍皆在事有功洊擢千總及忠烈巡撫安徽公乞假歸亡何忠烈破圍廬州其弟忠潛及同知劉長佑募壯士赴援公二然曰此吾立功之會也遂充哨官比至壁平西門外五里墩時廬城中兵單餉絀賊圍之數日聲息不通公夜帥壯士十數人懷白鏹油燭潛越賊營縋而入告以援至因留營中賊屢用地雷轟城城崩數丈公率眾力禦斬悍賊數人城復完又數帥壯士下城攻賊壘斬馘多忠烈壯之奏以守備用賈孔雀翎亡何城陷忠烈死難揮公使速去公不忍忠烈趣之曰若歸

續碑傳卷六十七

二

為我復仇公跳而免時楚勇屯得勝門外七里站賊營羅列我軍與賊相持五年春諸將議逼賊而營公首櫻其鋒晝夜合諸營力戰遂破賊營八禽斬三千有奇敘功晉都司及廬州復再晉游擊賜號毅勇巴圖魯會江忠潛假歸以所部屬公公遂為楚勇統領六年五月提督和春帥師克三河鎮公與提督熊天喜攻南路破賊營二以功擢參將及克巢縣遷副將亡何總兵秦定三攻桐城久不下公奉檄帥所部往援時道梗不能通聲息公以計馳抵定三營中定議出奇兵夾擊遂破賊營十有六進逼桐城十六日賊大舉出犯公帥眾迎擊賊敗退追至東門外賊踰濠堅拒公持矛躍馬越重濠而進手瘡悍賊數人賊壘礮雨下中公左腋死之

詔貶副將例從優

賜卹

賜葬祭祀江忠烈專祠

子諡壯節

蕭公翰慶字黼臣清泉人咸豐元年從都司徐大醇勦賊廣西大醇死級公冒險扶其櫬歸三年曾文正治水師於衡州公投效軍中以戰功

淳保千總四年夏進攻岳州賊遁手紅旗報捷文正奇其文雅詢知爲
讀書士改敘從九品從克武昌擢府經歷再擢州判六年改隸彭公玉
麟部下充水師營官同攻武漢晉同知直隸州冬十月武昌克復晉知
府七年從彭公帥水師自外江會攻湖口將戰公察山後炊煙起知有
伏乃潛從山後進擣一鼓殲之遂拔湖口

詔賞孔雀翎八年四月官軍克九江公與副將孫昌凱等登岸截擊北
城逃賊無一漏網者敘功加道銜九年正月僞翼王石達開自江西南
安竄湖南道郴桂圍永州長沙戒嚴鄂撫胡文忠檄公帥礮船援湘四
月朔抵祁陽時沿江皆賊壘公躬入小河乘舢板督戰平之總兵周寬
世及賊戰於長葉嶺公帥礮船夾擊之賊大敗湖南肅清乃回鄂

詔以道員交軍機處記名簡放十年春江甯賊犯杭州浙撫羅公遵殿
疏調楚軍援浙公與羅公子忠祐有舊遂請行倉猝無見兵得唐君訓
方舊部號訓字營者四千人益以池州降卒二千馳赴之抵徽州而杭
城已陷時左副都御史張公芾方治徽甯防務疏留公辦賊尋攻石埭
太平克之

詔加鹽運使銜方進攻池州而常州趣援甚急乃分降卒圍池躬帥訓

續碑傳卷六十七

三

字六營暨親兵二營赴之途次聞湖州被圍乃改援湖時前路賊騎充
斥眾請緩行公曰湖州皖浙咽喉也儻有失則兩浙糜爛矣行抵禮義
橋悍賊突出公截橋而戰勝之日暮大雨軍士竟夕持仗立風雨中平
且啟行距湖郡四十里甫半而賊復大至我軍且戰且進抵同心橋賊
來愈眾圍公數重參將吳修攻鄧茂先戰死公血戰良久力竭死之年
三十有四事聞

詔加等賜卹

子諡壯節原籍及死事地方並建專祠

贊曰軍興以來楚之南荷易名之典者百餘人而陳江蕭三公並得諡
壯節外此則江公忠濟童公添雲金公國太也諸公文武殊途事蹟亦
各別而其無忝於令名則豈有異耶諡法猛厲無前曰壯好廉自克曰
節烏虜諸公得此其皆無憾於九泉也夫

又記江壯節公死事

方宗誠

公名忠信字誠甫湖南新甯人前安徽巡撫江忠烈公之族弟也隨忠
烈公擊賊剛果異常積功官至湖南候補參將加副將銜咸豐六年八
月提督秦定三統兵勇來桐城營於欄杆山十里鋪月餘未得攻城術

而賊來益眾遂被圍十有八日是時公隸壽春鎮總兵鄭魁士麾下從
鎮軍復巢縣有功鎮軍帥兵來桐會勦至則圍已解矣遂駐軍三十里
鋪不急進公念是時大兵齊集當乘勢擊賊不可濡滯失機乃請獨率
偏師逼賊壘賊出戰敗走公追賊首將生禽之賊中大譁亂而公忽中
火鎗死年二十七公卒後諸將益不敢遽進而賊勢日多七年二月大
兵盡潰先是公士卒得公尸歸面如生余與友人文鍾甫張季彝爲備
冠服以斂焉

論曰秦提軍之始至桐也是時城中賊數百人聞廬江復軍威振恐懼
思逃而提軍持重不進以失事機其後鄭鎮軍克復巢縣至桐兵勇數
萬人賊又震恐而鎮軍復不知乘勢大進公以偏裨奮勇獨前其死也
宜哉而或反以過勇爲公咎悲夫公生平戰功吾不盡知故特記其死
事

陳武烈郭勇烈王剛毅公別傳

李元度

王師之克江甯也圍攻近四載用地雷法穴城三十餘處皆不就傷亡
不可選紀洎同治三年六月朔提督李公臣典請從賊礮最密處重闢
隧道統帥曾公國荃趨之命各軍於城下築礮臺護地道別遣軍士刈

續傳卷六十一

溼葦蒿草積城下覆以沙土陽爲肉薄攻城狀賊用全力扞爭礮彈
雨下是月十五日賊出死黨犯隧道燒礮臺我軍血戰竟夕於是副將
陳公死於戰總兵郭公王公中礮亡十六日地雷發李公臣典及武公
明良伍公維壽朱公洪章劉公運捷等率各軍蟄附登城賊傾火藥數
十箱燒士卒多死勢稍卻彭公毓橋蕭公孚泗等手刃數人冒險入拔
之盡殲逆黨成大功而三公不及見矣予悲之爲作三忠合傳

陳公萬勝湘潭人初從把總蔡呈祥援江西克萍鄉分宜旋入吉字營
克吉安敘藍翎外委咸豐十年同擊退小池驛援賊進克太湖擢千總
嗣是屢戰皆與十一年大軍克安慶進規江甯同治元年克巢縣和州
含山渡江克太平府金柱關尋取丹陽鎮奪秣陵關暨六郎橋江甯鎮
猛攻雨花臺公皆爲軍鋒閏月江甯援賊大至九月十二日賊鑿隧道
轟我營公協力扞禦裏創戰苦守四十六日賊敗退累功洊擢副將
賜孔雀翎三年六月堅李公臣典新關地道成統帥曾公入隧親勸之
賊遣死黨出太平門直犯地道別從朝陽門出數百人燒各礮臺及所
積蘆蒿公督隊血戰竟夕殲賊百餘人力竭死之賊裂屍竿其首於城
翼日城拔

郭公鵬程湘鄉人咸豐六年隨羅節節克義甯敘藍翎把總明年同擊走武昌援賊擢千總武昌復再擢守備加都司銜又明年從李忠武擊退九江援賊敗賊小池口童司簪尋拔湖口遷都司

賞換花翎加游擊銜冬江西賊犯湖口從李公績宜往援八年克九江晉游擊加參將銜充右營營官十年攻太湖偽英王陳玉成糾悍賊來援會荊州將軍多隆阿公提督鮑公超敗賊羅山冲公與諸營夾擊禽斬三千有奇九年從援寶慶圍解除參將十年從克太湖遷副將英酋糾捻匪上犯絲新安渡撲湘軍我軍分八路進攻公出第三路大捷賜號衝勇巴圖魯十一年五月英酋竄德安隨州圖解安慶圍候補道金君國琛率八營會剿公與馬誘賊出城斬馘數百城破追剿至應山斃賊近萬人

賞二品封典同治元年同提督蕭公慶衍攻銅城聞賊堅壘死拒公與趙公太和攻第一壘藉其巢須臾眾壘皆破援賊至公設伏黃龍村與蕭公夾擊敗之明年克東關及和州含山巢縣復江浦浦口皖北肅清詔交軍機處記名以總兵簡放江甯久不下奉檄與蕭公等其帥入營往助攻三年六月挖新隧道公遣卒刈蘆蒿積城下城上礮彈若飛蝗

續碑傳卷六十七

五

公奮前督攻與王公皆中礮沒於陣

王公紹義湘鄉人少入湘軍累功洊保記名總兵

賜戴孔雀翎隨攻江甯於同治三年六月十五日死綏十六日城克當事上其功

詔曰花翎副將陳萬勝記名總兵郭鵬程王紹義功績卓著力戰捐軀朕甚閔之其照提督例議卹各賞三等輕車都尉世職尋

賜祭葬入祀京師昭忠祠內閣以諡請有旨萬勝

子諡武烈鵬程

子諡勇烈紹義

子諡剛毅

多忠勇公別傳 李元度

多隆阿公字禮堂蒙古正白旗人隸黑龍江部世居齊齊哈爾城咸豐二年粵賊自江甯分黨北犯蒙古科爾沁王僧格林沁公統義師入衛詔徵黑龍江騎兵助剿公以參領帥二起馬隊入關隨征高唐州連鎮及馮官屯各賊巢平之五年奉檄援湖北隸江甯將軍都興阿公麾下

六年從克武昌漢陽加副都統銜補協領充行營翼長進剿蘄州敗賊於曹家河復黃梅廣濟進次孔隴驛賊來犯廣濟公敗之當是時李忠武續賓帥湘軍圍攻九江悍酋林紹璋死守不下復於對岸小池口築僞城號新城縣環以堅壘七年正月賊夜築土城於魏家園公曰舍此不擊賊將益據要害急擊之夷其城於是附近之桂家畝賊壘及土城悉破未幾賊復於段窯築壘以通饋道公破之尋會各軍攻拔小池口時三月九日也皖賊悉銳上犯都公命公分駐濯港扼賊衝別遣鮑總兵超帥霆字五營駐意生寺備策應賊於楚皖交界之楓樹坳陶家嶺獨山鎮一帶各築堅壘自固公揚言先取獨山鎮而暗襲楓樹坳拔之後二日復揚言先取二郎河而回軍掃獨山鎮又拔之賊自是見公旗幟輒喪膽矣僞英王陳玉成驍勇健戰眾稱四眼狗者也率悍黨踞黃梅縣境之停前驛號四十萬連營百餘里四月都公督兵進剿戰於渡河橋平賊壘二十有一賊黨移小併大謀堅守以抗我軍五月賊於大河埔池北依山增壘遂攻黃梅縣城公與鮑公赴援連戰兩日賊始敗會捻酋李兆壽率黨六千人來援增壘於馬尾山錢家灣等處尋犯廣濟窺武穴公約鮑軍夜劫賊營陰伏兵要隘待之昏黑中賊不辨眾寡

續碑傳卷六十七

六

大敗潰伏兵乘之遂拔數壘然來者愈眾以數路牽制我軍餘上竄蘄州更分黨橫截童司牌黃蠟山以出我軍之後勢張甚會湘軍自九江來援公會戰大破之夷賊壘百餘追奔至宿松城外克黃梅於是楚境報二次肅清矣八月賊棄宿松遯公帥馬步軍壁城外令鮑軍戍二郎河以防回竄九月賊陷太湖繇潛山石牌黃泥港三路來犯分黨踞涼亭河公與鮑軍約先勦涼亭遲明大戰自辰至午蹋毀涼亭河諸壘而悍酋僞陳天福等率四五萬眾仍踞石牌且結十三壘於楓香驛以犯二郎河之軍十一月公進次二十五里墩約鮑軍進攻賊殊死鬪公輕騎帥勁卒馳出賊後賊驚潰而潛匿民舍諸賊皆起賊見外援眾益憑壘堅守公督軍鏖擊移時火其柵破十三壘禽斬四千有奇敗賊回竄太湖罷戰已二鼓矣八年正月僞地官燕等率黨七八萬繇渡船口等處上犯連營三十餘里將以綴我師而緩潯城之攻也公察其未成列急擊敗之禽其酋及四月朔而九江復矣八月公與鮑軍進攻太湖先破城外四堅壘賊棄城走潛山公遂與鮑軍進次石牌以規安慶石牌者地衝要與安慶爲輔車者也賊據山阻水用重兵築壘堅守之輔以鐵船八月公進攻上石牌鮑軍攻下石牌縱火焚木城破卡十盡平其

堅壘而東岸賊壘四初猶死拒我軍奪賊礮船渡河進擊皆大潰計斃賊六千有奇其逃入安慶城者僅悍酋數十騎而已自石牌破安慶勢益孤公逼城而軍賊預從北門外築九壘引湖水灌濠以自蔽九月公與鮑軍合攻斬首數千級城賊出援又大敗反奔入城城酋急撤閘板不得入殲焉於是九壘悉破急移軍壁其間城賊數出犯皆敗卻之又敗其掠食之眾十月賊將突圍遯爲官軍所遏勢窮矣亡何湘軍敗於三河舒桐潛太皆失陳玉成率悍黨七八萬回援安慶全局皆爲之動公不得已自焚其壘督騎兵殿後命步軍徐退賊數來犯數敗之行抵宿松決計守縣城次日賊大至天霧咫尺不辨人馬公分五道迎擊三路策應令民團列高阜按劍觀戰俟我軍勝凡賊中輻重任恣取之比戰公親帥鐵騎陷陣敢死士隨之刃旣接斫賊如瓜擲首陣外諸將夾攻呼聲震天賊稍卻民團立山椒觀者皆大呼曰賊敗矣遂驚潰自相蹂踐死者萬計鮑軍射陳玉成中肩賊引去是役值三河新敗後人心離邊得此捷實東南大轉機也於是楚督鄂撫交章薦公可大用然賊雖受重創猶不時來犯也乃命鮑軍戍二郎河而自當荆橋一路賊以全力犯鮑軍公濟師援之大破賊於黃泥港逐北二十餘里賊始不敢

續神傳卷六十七

七

闕鄂壘然玉成仍糾黨三萬餘踞宿松所屬之花涼亭阻險結營二十餘壁十一月公出不意大破之赭其營玉成精銳十七七八乃痛哭潰竄公遂偕鮑軍進規太湖屯王家畝一日賊犯霆營甚急來請援公誠勿輕動而張樂宴諸將酣呼達旦賊偵知其無備遽舍霆營乘夜來襲公預伏兵要隘賊至大敗之其出奇不測多類此是年冬都公奉

命督師揚州疏舉公自代遂以皖事屬公矣當是時曾文正公方以侍郎持節督水陸軍東規江甯而尤以取安慶拔太湖爲先務九年正月太湖賊屢出犯皆擊敗之遂移營逼城下諸將謀稍遠避鋒公曰不入虎穴焉得虎子敢言退者斬賊憑城出鬪師小卻公力戰挫之壘即日成賊亦增陣濬隍決上流引水入濠以相抗二月胡文忠檄督糧道唐訓方帥所部來會攻援賊分三路大至距太湖數十里而石牌復爲賊踞且築僞城公先破蠟樹柯茶婆嶺賊巢自三月至四月兩次攻城弗能下八月公以石牌與潛望宿太毗連必先取石牌而後太湖可下乃選精銳自茶婆嶺進兵用火攻困之正廩鬪聞援賊一自潛山來一自安慶來公派馬隊分途擊卻之遂再克石牌令提督雷正綰駐之時太湖久不下

廷旨趣進兵胡文忠檄候補道蔣凝學來濟師時公已補授福州副都統各軍在太湖者悉歸公節制十二月陳玉成勾合捻酋龔瞎子張落刑悉黨十餘萬三路援太湖公令鮑軍壁潛山小池驛以當前敵移蔣營駐龍家涼亭而自帥馬隊駐新倉賊犯霆軍公親帥馬步進戰鮑軍夾擊之追至地靈港破東岸十一壘參領西林佈力戰死之其西岸賊壘六爲參領喀爾庫等所破喀爾庫追賊中毆死我軍殲賊數千計雖有傷亡猛氣益厲而陳玉成恃其人眾兇狡亦自若也於是胡文忠檄趙克彰朱希廣二營移駐太湖東門以防賊竄玉成忌霆左營之扼其衝也築礮臺圍轟之子若飛蝗穿營幄如敝網士卒循牆蛇伏樵汲不通穴地以爨鮑公請他營來代公命雷正綰楊朝林等各分軍半代戍其壘移霆左於霆中營俾暫休養更以王可陞一營繼其後復派死士百人夜襲礮臺掩殺守礮賊又以蔣鮑兩軍相距遠急抽營結壘以彌其隙十年正月令唐營移駐蔣鮑兩軍之閒又以一營駐霆左傍俾霆左仍駐原壘會胡文忠已派候補道金國琛帥六千人冒雪自潛山之天堂進兵與諸軍夾擊二十六日公親帥馬步隊分五路進擣適東南風緊火其柵館延燒七八里破賊壘百餘殪賊七八千生禽三百餘名敗賊復爲桃花埔伏騎所截殺直追至潛山城下明日乘勝克潛山捷

續碑傳卷六十七

八

聞

詔賞公頭品頂戴潛太克後賊黨回竄桐城時湘軍攻安慶已合圍七月公由挂車河進兵駐桐城之西北是夕賊來劫營爲伏兵所敗公察城中守備嚴惟西北隅求雨嶺有橫嶺一綫高三丈許曲懸如弓山前有小岡號毛狗洞賊築石砦其閒護以木城復於城外築磚壘水堡環之公僞作攻城狀別遣勁卒自山後屏風嶺直擣求雨嶺之背昏夜築礮臺三比曉臺成賊驚以爲神乃大治攻具分二十道進攻毀其木城水堡賊三次出撲並經擊退遂奪毛狗洞石砦全城在目中矣尋掘隧道轟城不就十月玉成勾捻酋龔瞎子孫葵心等悍黨十萬自舒城廬江援桐城冀解安慶之圍以逆眷在圍城中也公迎擊於挂車河敗之賊於望鶴墩等處增築營壘公分三路進攻又大敗之賊仍嬰城抗拒時安徽按察使李續宜駐軍青草壩公函約夾攻自帥馬步各軍分路進所嚮披靡李軍亦破棠梨山賊巢與公軍合正酣戰聞各路兵馳至遂毀賊壘四十有奇賊館百餘處殪賊八九千墮水死者又數千生禽千三百有奇解散萬有數千陳逆敗竄廬江而桐賊遂閉城堅伏矣

詔賞穿黃馬鞋是年冬玉成仍勾合僞玕王洪仁玕僞璋王林紹璋等眾號十萬旁繞英霍圖上犯楚置以牽掣圍皖之師公力扼其衝賊不敢逞十一年三月公進屯高河埔扼水而軍紹璋等來犯大敗之賊爭赴水死河水爲之不流遂分兵合攻安慶尋被賊於新安渡斬首二千級是日部將穆圖善亦敗賊於挂車河四月敗陳玉成於磨山又敗之於鮑家橋玉成復糾髮捻三萬眾分犯青草塢高河埔挂車河公先發制之以馬隊二支步隊一支爲伏兵又分步軍爲六隊戰於江家橋賊殊死力拒我伏騎衝入賊陣各營乘之賊大潰後路火起伏騎已焚項家河賊館賊眾益亂玉成奔竄桐城遂焚江家橋麻子嶺及黃家埔諸賊巢蓋玉成挾全力圖解皖圍微公五戰勝之安慶之圍弛矣胡文忠疏稱公謀勇兼全忠勤倍至雖古名將無以過之因奉幫辦軍務之命六月賊乘秋穫大舉來刈稻公敗卻之七月玉成率巨股一繇英霍上趨太湖一繇潛山下踞高樓嶺等處連營數十里公命佯敗以誘之詐稱病甚不能督軍賊至偃旗息鼓閉關不出賊大詈如弗聞也者如是數日夕賊終疑之尋獲我閒謀謂公實病林紹璋大喜以告玉成遂以十一夜來犯公預伏二十餘營於左右路賊至夾擊皆棄械奔桐城

續神傳卷六十七

九

以追兵急不能入城爭竄蔣家山遂燬其木城及賊館二百餘處次日敗賊竄廬江爲我伏騎所截殺斬首四百餘級天曉賊出援又敗之遂將城外七壘蹋燬是夕公登輓車遠眺曰賊眾十倍於我連戰皆敗今知吾所在夜必來劫營乃潛徙其軍賊夜至得空營大驚以爲神遂引去八月二日五鼓遙望高河埔火光接天偵之則壘已空集賢關之賊爭竄石牌一路公曰安慶破矣蓋曾公國荃業於朔日拔安慶也公急召穆圖善密授機宜俾進攻桐城仍遣輕騎分截竄賊皆殲之而是日穆公及雷公正綰已乘勝攻克桐城越四日遂克宿松又三日克黃梅廣濟賊亦遁矣先是桐城旣克舒城賊膽寒公密諭穆公率捷師揚旗境上而於走廬州之路伏甲伺焉舒賊果棄城走廬州途次將蓐食伏發圍殲五百有奇於是舒城亦復捷聞

詔賞公雲騎尉世職十一月遷正紅旗蒙古都統又旬日擢荊州將軍蓋未一歲而已三遷矣時三河賊亦棄僞城遜公遂規取廬州同治元年正月公進兵廬州賊出數千人迎拒敗之遣騎軍斷其糧路二月奪賊礮船二火大興集賊巢僞鑄天侯普祥甫等率賊千餘投誠散遣之尋破西門得勝門賊壘四會袁端敏甲三檄建甯鎮總兵張得勝帥五

千人營於廬北之橫店公以玉成恃水爲險乃令掘隄決水賊數來撲皆敗之然濠長水深不能盡三月援賊大上乃停掘隄之役四月敗賊於北門遂併力攻城破東門三壘玉成出援大敗不敢入城嚮板橋河一路竄去賊大亂各營肉薄登城乘風縱火遂拔廬州分兵追玉成玉成斷浮梁以數百騎奔壽州是役殪賊近萬生禽八百有奇斬僞官二百十有三解散七千餘眾時十五日未刻也陳玉成走投練總苗沛霖入壽州公令穆圖善雷正綰帥師追之距城四十里逼獻陳逆沛霖不得已禽玉成解前督師勝保營誅之公以玉成爲第一兇渠今竭數年之力得殲之賊不足平矣捷聞

詔加賞騎都尉世職五月擒匪自河南竄陝西逼西安官軍迎擊失利詔公馳赴陝省督辦軍務公改轍而西途中兩奉

諭旨趣行其時僞扶王陳德才勾合捻首姜汰陵張落刑等二十餘萬三路窺秦公慮關隘爲其所奪命先鋒雷正綰以陶茂林等三千人兼程前驅令穆圖善等綴賊後而自帥大軍繼之七月抵商南陳德才已躡我軍之後截我餉道公與穆公回軍掩擊大破賊於荆紫關殲賊四千蹈水死者亡算遂復其城賊宵遁明日公令馬隊追賊步軍暫息自

續碑傳卷六十七

十

以單騎入商南而姜汰陵已率黨三萬驟至商南城陋甚賊繇富水關來適當其衝公飛調留駐浙川之衛隊四營來商令官吏兵民男婦悉登陣協守洞開城門賊疑之終不敢逼迨夜來攻公已遣騎軍分伏城外爲疑兵而自帥衛隊開東門掩擊賊皆潰退詰旦公帥輕騎出城誘戰被賊圍抄公躍馬衝突立將部卒拔出賊不敢追是夕遙見火光燭天礮聲隱隱不絕偵之則部將朱希廣率四營自閩道來援夜半戰於穆家河距城十二里遲明再戰斃賊二千有奇以阻險回駐三角池公以賊眾且悍預調王萬年三營來援賊於二十九夜解圍西竄而公已預調陶茂林等設伏扼武關截其去路禽斬以千計又親督王萬年等躡擊之商境亂山叢雜兵勢難於展布公棄馬登山持令旗覘賊所向以旗指揮一敗之於石馬寨再敗之於武關於山口於扼馬溝又大敗之於太平山三角池前後殄賊萬餘首僅以身免張落刑亦聞風遁是役以數千疲卒破五六萬悍賊

天子壯之賞黃馬褂一件及江綢被料荷囊挾拾小刀諸珍品而部將雷正綰亦遷固原提督奉

特旨幫辦軍務矣會有

詔命勝保督辦陝西軍務移公赴南陽力籌防剿公敗陳德才於樊城又敗諸唐縣鎮遂屯軍樊鄧間亡何勝保覆軍回氣益熾

詔授公欽差大臣仍督辦陝西軍務十一月公入潼關逆回圍同州公擊其背一戰大捷解其圍回酋倡亂九閩月受創自此始遂扼賊於洛河之南其地林木叢雜袤斜百餘里古稱沙苑產蒺藜公部多南勇跣足搏戰苦不便公多購草履令以布裹兩足著之兵威始壯又以滾營法逼賊而壘二年春連破羌白鎮王閣村末華喬店孝義倉渡諸賊巢馮翊悉平初公之破諸砦也沙苑林中零星回巢未嘗遣卒搜捕諸將慮未盡絕公笑曰君等尚謂賊未空出耶我扼其吭彼不合併庸有生路乎不信益覘之翌日往探果如公言五月師次交河口公適患暴下憊不能督戰迺擇諸將中持重者得穆圖善陶茂林令分軍跨渭爲營以驍將朱希廣趙旣發輔之希廣與旣發素相善欲併營於北岸當賊衝公慮以勇債事弗應二將請益力公不得已乃許之復戒曰君等當聽吾言賊至堅壁勿戰吾自有法破之慎勿輕出也二將初尚耐守後以公病久賊日辱罵不能堪遂背令而出果中賊計遇伏戰歿公聞信力疾乘肩輿以後隊二千人往援大破之克交口十三村等巢翦滅殆

續傳卷六十七

上

盡尋又被南岸馬烏什東沙河諸賊砦餘逆膽落不敢迎戰公慮其遁走遣卒招撫賊詭應之而陰以車馬運輜重西去公覺其詐密令曹克忠繞道截擊自率大軍進薄高陵無戰不克旬日間連克高陵涇陽縣城及塔兒寨永樂店咸陽之渭城灣蘇家溝馬家堡白起營各賊巢六十餘處縱橫二百餘里賊尸徧野馬不能行於是京兆亦定尋遣雷正綰援甘肅命陶茂林解鳳翔城圍進攻白吉原等處賊巢悉平之關輔肅清公欲度隴窮勦回匪先埽盪漢南川賊以清後路賊偵知之乃東遁而悍酋藍大順自西蜀竄至陷盩厔公馳軍圍其城盩厔城小而堅藍酋又善守誘以計不出轟以地雷不墮公迺選各營健卒數百人力攻月城令將士曰賊雖善守月城破彼不能安處矣吾今分諸軍更番攻擊以逸制勞不出兩日賊必走西門近山必繇此出吾已預設伏兵藍酋可禽也迺親上礮臺擊鼓督軍力戰兩時之久悍賊死者十九公忽爲礮子中傷左目而鼓音猶不絕是夕賊果由西門遁伏起藍酋身中數鎗逸至南山遂成禽餘賊悉滅公自提兵討賊身經三百餘戰克城砦二百有奇酷暑嚴寒未嘗安枕至是以創甚卒於盩厔大營同治三年四月十三日也年四十有七事聞

天子震悼

卹贈太子太保

賞一等輕車都尉世職入祀京師昭忠祠其直隸山東山西河南安徽湖北江西陝甘等處立功省分均著建專祠賞銀千兩治喪

子諡忠勇公天性忠毅嘗誡其下曰我輩受

朝廷爵祿不能滅賊何以問心言次輒泣下治軍嚴重用法尤峻每戰身先士卒不避鋒鏑兵勇被傷者力撫慰之至以己所乘騎載之歸所得廉俸悉以充犒賞官文恭知其貧郵寄三千金贍其家公知之馳卒追取悉為戰士購征袍傷疾篤時昏迷中頓呼殺賊無一語及家事料敵如神尤知人善器使賞罰無所偏生平不識漢字遇公贖使人誦以聽為指瑕而易之輒精當羣服為天授云子雙全襲各世職併為一等男贊曰

國初以神武定天下東三省勁旅實為根本所嚮輒有功近稍陵夷矣然得公及都公為之將則旌旗為之立變戰勝攻取若操券烏虜豈不以其人哉乃者鄰氛狡逞三韓頗多故矣語云聽鼓鞀則思將帥之臣安得起公於九京俾奏廓清摧陷之力哉

將軍明緒公傳

陳繼聽

續碑傳卷六十七

十二

明緒公滿洲鑲黃旗人由生員官部郎累擢至伊犁將軍同治三年十月回部亂糾眾犯伊犁公督將士防守旋與葉爾羌參贊大臣額騰額出攻賊營連戰十有一日圍始解賊東竄犯巴燕岱城領隊大臣富勒敦泰出兵迎擊未能獲勝公遣額騰額同伊犁領隊大臣崇熙錫伯營領隊大臣烏勒德春綏定城總兵沈玉桂率師三次往援後先皆敗既而巴燕岱失守賊復騰集伊犁公與前任將軍宗室常清分兵堵剿籌布一切相持年餘而賊氛日張句結哈薩克布魯特之眾十餘萬四面圍攻凡屬城關隘臺卡等處盡為逆回蹂躪遠近數千里聲息難通僅存伊犁孤城外無援軍內少積餉勢岌岌不可支四年十一月公使同知增智往霍爾果斯城運糧回至沙果離伊犁城西三里許為賊邀截增智及防禦圖山布陣亡由是伊犁之食遂絕官兵殍死過半乃用樹皮油渣磨麩散放充飢賊且直薄城下公偕諸將分守各門晝夜登陴親冒矢石與下同受艱苦眾感公之忠義俱無貳志五年正月十九日賊掘地道暗置大礮轟壞堞垣公急用土填完缺處二十二日賊又縱火延燒北門轟擁而入常清富勒敦泰烏勒德春沈玉桂及理事同知

穆津五品藍翎什亮皆悉戰歿而常清庶母程氏妾王氏越氏子五品
蔭生德潤女貞格蘭格安格定格亦被賊害公同崇熙退守旗營賊懼
滿軍聲威不敢驟逼越三日賊攻陷旗營崇熙手持大纛率部兵一百
人衝出與賊鏖戰至北關火神廟力竭而死賊爭入署公命家人開門
舉火偕其妻及二子全家自焚其時崇熙妻宗室氏孳一幼子亦在將
軍署內焚死額騰額先在城外殺賊左膀受鎗傷繼而守城左目復被
鎗傷至是內營又被奔告其母母年已七十矣歎曰當與汝以死報
國耳遂召集眷屬十五人焚其廬帳成灰燼焉又知縣李應誥以事謫
戍伊犁亦與妻子殉難光緒元年將軍榮全疏聞於

朝均

賜卹如例

論曰自同治五年伊犁失守至光緒初相隔幾及十稔明將軍與諸大
臣殉難迢迢萬里無從訪問竟以錚錚之大節湮沒遐荒亦可哀已幸
天威震疊新疆以次恢復逆氛肅清而忠義諸公乃姓氏大顯得受
聖主之表揚不且與

高宗朝班尙書鄂侍郎後先爭光乎

忠壯公平瑞傳

陳繼

續傳卷六十七

七

人交恆以道義相砥礪官本旗參領惠卹兵丁而操守清介人不敢干
以私咸豐閒番船犯天津公每談及時事艱難往往慷慨泣下屢請從
戎效力以款議就不果後游升新疆參贊大臣同治元年擢授烏魯木
齊都統至任直屬城兵餉支絀悍卒洶洶鼓噪公密禽渠魁陳忠置之
法撫慰其餘事遂戢復捐銀十餘萬分給各營充餉奏開馬廠荒地招
民墾種命司庾者歲儲糧備不虞烏城舊有義學頽廢日久公興復之
延請師儒以課八旗子弟文教爲之一振三年五月逆回變起屬邑昌
吉綏來阜康奇臺吐魯番等處先後數日相繼陷賊進犯烏城城中精
卒因前月庫車亂均征調赴援存者千餘人半係老弱公與將吏激以
大義登陣守禦復募壯勇出戰於報恩寺南梁西山坡頗有斬獲終以
賊盛未能全勝遂議嬰城固守以待伊犁援軍適署昌吉知縣恩謹率
團勇突圍至躬督南山民戶運糧入城賊勢稍卻已而各路回逆麇集
百計環攻鑿城外潰垣列礮其中擊東南角雉堞皆毀醜徒蟻附而登
公急率士冒煙燄死拒之齊發火箭斃悍賊甚多乃退相持八十餘日

糧盡始以牛馬酒麪爲食繼則茹草根啖樹葉餓殍滿道上皆病莫能興而外援終不至九月十三日城陷公尚在西北堞樓督兵有謂宜暫時出走以圖後舉者公目背盡裂叱之曰我邊疆大臣受

朝廷厚恩豈能出此半步城亡與亡臣子之分因顧城上官兵曰有敢從我巷戰者乎滿營少年二十餘人肩擡鎗相隨下至鼓樓擊賊傷數人賊來愈眾公知事不可爲北向頓首訖持佩刀謂諸人曰我不可以身受辱汝曹各覓生路言已遂自刎其妻妾二女二幼子及僕媪等在署中聞變俱殉焉十三年哈密協辦大臣景廉以公死狀奏聞

詔命從優議卹

子諡忠壯並立專祠祀之

論曰烏魯木齊之陷也由外無援兵時人多歸咎於伊犁將軍其實此時叛回四起凡西甯鎮西所屬之廳縣無不殘破伊犁亂雖稍後外須救巴燕岱內則自顧會城勢亦岌岌甚殆而將軍常公卒以是罷職及明將軍代任則烏魯木齊已淪沒賊氛大熾更日不暇給矣是伊犁不救烏城者力有不足而未可遽以罪將軍若夫平都護堅守危疆終殉之以軀視古蓋臣豈有愧哉

梁剛節公傳

王先謙

續碑傳卷六十一

四

公姓梁氏諱洪勝字華彬湖南長沙人也縣人丁銳義募勇剿賊武昌公隸麾下以斬級功由六品軍功敘把總從克武昌漢陽擢守備加都司銜賊踞蘄州黃泥坂官軍攻之賊不出公請於銳義約諸軍退單騎至賊營前肆詈以誘之僞丞相韋朝綱帥羣賊徑趨公公馳馬斬悍賊三禽朝綱羣賊趨救公急斫朝綱朝綱回斫公負重削力持之不釋羣賊前公復殪其魁餘相顧莫敢近官軍自山嶺呼而下賊大潰平其七壘還師斬朝綱一軍稱神勇擢都司加游擊銜充營官銳義殉難三河公突圍出以所部屬都統多隆阿公卻舒城援賊擢游擊破援賊桐城功最擢參將加副將銜破安慶援賊擢副將

賞果勇巴圖魯號復桐城宿松黃梅加總兵銜隨多隆阿剿捻匪河南解陝西南商圍以總兵

記名簡放湖北巡撫嚴樹森素聞其勇檄令統一軍駐漢口捻賊數躡湖北圍王桐柏成大吉於霸山公赴援一日夜馳二百里未至霸山賊解圍去公追擊樊城卻之又躡之光化賊走河南時賊鋒銳甚官軍妻敗襄樊獲安公之力也公自領軍聞警卽赴未嘗待大府檄調檄至如

其計滋重大府顧公既以勇名益剽悍自喜無紀律賊既入河南而粵匪賴汶洗自漢中出與之合竄天門據阜市眾號數十萬公孤軍轉戰大敗於花台被圍七晝夜僅以三百人免諸軍無捄者總督官文劾樹森落職欲殺公檄其軍駐蘄水賊大至公力戰卻之追至羅田解都統富森保之圍重賂官文左右官文更愛之奏公忠勇無兩益其軍專倚以辦賊賊踞黃陂之街埠公禦之輕騎摩賊壘賊夜伏隘攢刺之墜馬親兵二皆死其軍弗知也時同治五年正月四日年三十有二事聞照提督例從優議卹

子諡剛節

賞騎都尉兼一雲騎尉世職

前史官王先謙曰余甲子從公天門花台之敗賊追官軍急公持矛立馬橋上以過軍賊愕眙久之退得免者數百人及禦賊蘄水日與數十善騎者挑戰以勝反余謂公此非大將事也答曰命在天即大將不死耶余聞人言自公微時即輕財上義通任俠性儻寡亡檢一日入酒肆擲巨金案上徧揖肆中客曰今日諸君盡醉酒直悉洪勝代償矣在軍日不殺賊不快及戰短衣橫矛馬上背刀手火彈火繩繆臂見賊輒大笑伺其至然繩擲彈遠矛近刀當者輒靡重自負卒以是蹶云詩曰起武夫公侯干城其公之謂乎濟之以整暇古良將莫過矣

曹仁美傳

湘陰圖志

曹仁美字毓楚一字澤庵咸豐六年投曾威毅伯國荃軍援江西鏖戰吉安天華山力戰陷陣克復萬安八年克吉安九年克景德鎮浮梁仁美功最多十年賊踞黟縣建德諸城勢猖獗時仁美改隸欽差大臣曾文正公國藩軍屢戰失利堅垣與賊相持仁美曰兩軍相持日久當乘其懈而擊之否則賊援至愈難圖矣夜分大霧率所部摩賊壘更籌寂然乃梯人越壘入手刃賊之司柝者縱火燒賊壘後軍蜂湧至斃賊數千賊驚潰克黟縣建德獲器械無算十一年國荃攻安慶久不下國藩命所部往助仁美與焉一日僞英王合江淮賊來援國荃督戰中流矢仁美負國荃登高阜揮諸軍奮擊遂下安慶以次克復銅陵含山和州東梁山蕪湖太平府秣陵關六且橋降賊萬餘人同治元年從國荃圍金陵仁美軍雨花臺西國荃以城中賊乏食爲持久計令諸軍毋得與賊戰凡四十六日仁美恚曰當賊不擊將何待乃以其軍出毀石壘賊頗死國荃以其勇薄責之仁美引疾歸投江蘇巡撫肅毅伯李鴻章軍

會大軍克復金陵餘賊突出廬戰湘淮諸軍失利於奔牛劉銘傳軍被圍急議者欲退保丹陽仁美曰賊雖銳困獸之鬪也當出奇兵擊之次日督諸軍進自駕小舟率健兒數人登輪船斃賊十餘人縱火船盡裂奔牛大橋角賊悉平軍無錫執游兵擾民者斬以殉四年春僞侍王李世賢犯漳州閩浙總督左宗棠檄蘇軍援勦鴻章遣仁美偕郭提督松林楊提督建勳航海赴援至漳方築壘賊大至仁美令諸軍毋動獨率所部三百人迎敵賊疑有伏不敢前仁美伺賊懈奮擊之礮傷僞侍王賊潰數日復漳州積功保提督

賞勵勇巴圖魯名號尋歸以兄仁賢領其眾五年二月國荃巡撫湖北調仁美與郭松林募軍湖北進至河南唐縣會捻逆由信陽竄鄂仁美與松林援鄂遇賊於德安薄而擊之至鍾祥賊大至戰歿羅家集事聞照提督例

賜卹同治七年

詔建專祠於原籍及鍾祥死事處

張勇烈公事狀

方宗誠

公姓張氏名樹珊字海柯安徽合肥人始祖鼂明時由江西遷廬州數

續碑傳卷六十七

六

傳至公高祖從周始居周公山曾祖世科太學生曾祖妣楊氏章氏祖傑祖妣李氏父蔭穀廬州府學生妣孫氏繼妣魯氏李氏祖若父以公兄樹聲官

誥贈資政大夫又以公攻克常州功奉

特旨賞給三代正一品封曾祖祖父得

誥贈建威將軍妣皆一品夫人公少讀書通大義因感世變習騎射不復事章句咸豐三年粵逆入皖父建威公奉縣檄團練鄉兵命公兄弟任其事時土匪讜起禽治數人里中以安四年同邑刑部郎中李公文安奉

旨團練回籍公與兄樹聲往從之五年春擊賊巢湖以親兵二十人爲軍鋒破賊千生禽僞戶部五尚書斬之於是以善戰聞於時冬從破巢縣賊營六年八月克來安九月從今山東按察使李君元華克無爲十二月攻克潛山太湖遂助守太湖先是粵逆悍黨與提督秦定三鄭魁士等相持於桐城至是回擾潛山潛山復失及太湖弁勇惴惴公所部纔五百人意氣閒暇日增壘浚濠以待賊至開壁急戰斬賊目數人又追賊敗之於新嶺下時當歲除無日不戰戰則身先挫銳賊氣大靡因

乘夜襲之遂遁走逆酋陳玉成最驍悍渡江奄至七年正月以全力撲
公公下令嚴備勿譁羣賊排進如堵始鎗礮齊發前賊應聲倒後賊曳
尸踵上如是者四五次始解去旣而參互我營之閒築壘十餘置竈晚
炊矣時各營糧藥皆匱消息隔絕有勸公潛師夜走者公叱止之鞞刀
帕首夜率敢死士百餘人緣河隄竹叢中蛇行而進直薄賊營中堅賊
巡隊數千沿隄林立公令驍勇者數人一躍登岸執旗亂颺賊驚懼不
知所爲公乘勢躍馬大呼隄賊倉皇走營賊不辨虛實遂俱潰委棄輜
重山積公令曰拾遺者斬於是軍士人人自奮公往來盪決呼聲震山
谷賊自相踐殺屍骸枕藉陳玉成遁回舊饑民沿江上竄巡撫福濟檄
元華赴援無爲公拔隊從比至廬州則桐城大軍已潰無爲潛山太湖
舒城六安相繼復陷公功未甄敘而威名由此大著於淮南矣是時皖
省糜爛賊所至誘脅鄉民充傷官蓄髮納糧抗者焚殺公里居與兄約
束練眾敢從賊者戮之遂率以鏹肥西匪寨敗捻張落刑於官亭八年
七月十五日廬州復陷巡撫翁公退軍保定遠賊氛大熾公與兄謀曰
練勇敢處可遏小寇不足禦大敵乃築堡於殷家畝阻河環山以爲險
逆酋陳玉成兩圍公堡皆敗之遠近歸者萬計堡舍不能容則分置兩

續碑傳卷六十七

七

堡於東偏而捍衛之於是公邑人今直隸提督劉銘傳山東布政使潘
鼎新甘肅涼州鎮總兵周盛波及其弟廣西右江鎮總兵周盛傳江蘇
徐州鎮總兵董鳳高均以公制寇有方相率築堡峙糧儲械簡丁壯惠
農商百餘里相望與公聯爲一氣歷四五年賊來則戰去則耕近則守
遠則出擊屹立賊藪中晏然無恐公又嘗率練勇從復霍山解六安圍
援壽州攻克三河城監論者謂此爲淮軍勁旅之所基而不知勵同仇
之志作敢戰之風實公有以倡之也帶練勇數年巡撫歷敘公功洊擢
以都司補用

賞戴花翎初逆賊起粵西徵兵四集莫能制蔓延六七省今大學士曾
公國藩以侍郎丁憂在籍奉

命督辦團練遂勅募勇之議是爲湘楚水陸各軍之所自始旣克湖北
平江西復安慶進攻廬州金陵時蘇省江以南盡淪於賊所存惟鎮江
上海寶山松江四城蘇紳自至安慶乞師曾公以湘楚各軍勢分則力
弱於是議募淮勇而以今協辦大學士李鴻章統之李公知公兄弟
等忠勇可任手書召之公兄弟遂從至上海凡前與公築堡捍衛鄉里
者皆應募各以其名爲幟卽今所謂樹軍銘軍鼎軍盛軍者是爲同

治元年三月時賊酋李秀成爲號忠王擁眾百萬公等僅十一營抵滬上背海面賊於兵家言爲絕地李公旋奉

命巡撫江蘇五月賊圍松江以圖上海分踞泗涇以扼援兵公從李公禦之於滬西而賊圍程學啟等於新橋游氣逼上海公與兄進策曰賊勢雖盛然氣驕而散宜乘其離巢遠植根未固急擊之李公曰善乃命公從兄會諸將攻勦與程學啟內外夾擊遂乘勝進攻泗涇毀賊壘數十松滬復安程學啟者亦安慶從李公其所部曰開軍後以提督死事嘉興諡忠烈者也六月公兄回廬召募樹軍戰守事一以委公七月十三日與攻青浦克之李秀成遣悍黨撲上海之北新涇以斷松青通滬之路公與程學啟等回援賊圍之七寶鎮數重我軍壁立不動擊敗之毀賊營十餘八月初新涇圍解賊奔嘉定李公命會諸軍進攻之九月二日公奮勇以雲梯擁入克其城進據江橋時蘇崑杭嘉諸賊以青浦嘉定相繼失懼我軍之乘勝進攻也合賊十餘萬銳意擊我四江口水陸四營以爲復陷嘉青窺松滬之計公與程學啟郭松林等進攻以援之賊迎拒乘賊半渡突擊大敗之然賊眾且悍不退也二十一日李公率劉銘傳至公進曰賊阻江以守我軍非逼賊衝築一二壘則進戰無

續碑傳卷六十七

文

地卽夕率隊潛伏賊營旁盡夜而壘成李公喜命詰朝會戰公率軍冒煙直入學啟等大軍繼之四江口之圍立解由是滬上軍聲大振蘇常各境之賊聞風惕息十二月常熟福山賊以城降附已福山復叛通蘇賊攻常熟常熟降賊乞援滬距常熟三百餘里中阻太倉前軍攻之未下援師不能達公乃與劉君秉璋劉君銘傳潘君鼎新吳君毓芬等議由輪船航海而進李公嘉之同率所部三千人以往二年正月抵福山上游之西洋港登岸進攻適賊援大至我軍病多傷亡者時西洋港口淺狹軍糧船不能入寄泊海中或風潮一作則飄入賊巢否則駛歸大海潮退又擱淺沙中或爲賊所焚非急克福山得口門則我軍無自立地公乃與諸軍議曰危地則戰古無他策請滾營進戰可乎眾曰善公首率樹軍進據蘆浦港距賊營里許諸軍次第進營壘未成而賊來撲別賊率悍黨萬餘撲蘆浦先立之營營內不及百人公先令所部游擊董鳳高守之曰鎗礮非中不發賊屢撲不動遂分犯銘鼎二營是時公已擊退新營之賊乃回軍援之斃數悍賊賊鎗中公右臂左右驚問公曰無恙也大呼奮擊賊始潰各營更番遞進距賊壘不及半里公會諸軍日日攻擊二月常熟援賊至相持未下而常熟城中乞援者日不絕

先是公兄召募歸留守皖中及聞公被劄率新軍由輪船駛至常勝軍
戈登亦至常勝軍者西洋人爲李公用者也水師提督黃翼升亦率所
部來會十八日克復福山石城是夜公與各營潛襲太火橋等處賊營
悉平之常昭城圍立解李公疏稱公等以福山危險之舉引爲己任意
能由險入深以寡撼眾會同諸軍解此重圍爲蘇軍一大轉局功不可
沒公前已洊擢至參將

賞給悍勇巴圖魯勇號矣至是得

旨以副將儘先補用福山旣克公從兄駐軍守之值太倉崑山相繼復
五月初移駐常熟大河鎮爲進取江陰無錫計先是大河鎮以西自江
陰顧山起至無錫城連五數十里賊營密布意圖接應江陰賊內竄常
熟而李秀成復渡江合逆眾水陸分路內犯公從其兄會劉銘傳郭松
林周盛波分路進攻甌河渡港更番苦戰顧山以西賊壘悉平七月劉
銘傳周盛波久攻江陰未下統領李鶴章檄公與郭松林繼之是時城
賊死守外賊十餘萬分道來援沿河木城十餘里石壘木柵百餘倚角
其間公至議與郭松林密由山後繞其背劉銘傳督所部依山前進直
擣其中周盛波等由城下橫穿其右東南援逆果大潰死者山積諸壘

續碑傳卷六十七

九

盡拔惟水師攻西岸失利公時已回營見之立率勇西援各軍卻退者
乘勢回擊鐘壘焚舟援賊淨盡遂同諸軍分門布守公扼南門之衝斷
賊去路八月朔日城賊懼有內應者遂克之賊鮮得脫者以公扼斷去
路之力也是時公兄從李公擊退東路蕩口竄賊江陰常熟全境肅清
李公遂檄公從兄進駐張涇橋與盛軍松軍相倚角期以規取無錫截
斷蘇常要路松軍者今湖北提督郭松林所部也公軍旣屢敗賊禽斬
千人毀其石營土壘輜重舟楫追至城下賊懼甚忽聞李秀成合七偽
王之眾竝洋人白齊文水陸賊十餘萬以來攻撲大橋角守兵請援公
從兄奉檄而馳時賊圍守兵甚急舟師多被擊沈者見公軍至整隊以
待公命所部劉克仁等分路進攻公兄弟從旁抄擊火入輪船藥艙如
雷震礮船被焚陸賊爭渡踐蹋各軍乘勝蹙之禽斬溺死者以萬計時
九月一日也秀成敗退以爲無錫官軍一日不撤則蘇常咽喉一日不
通金陵杭州亦難孤立密約僞護王陳坤書自常州出犯江陰擾我非
路僞侍王李世賢由溧陽宜興出擾我西路而自率賊八九萬船千餘
連營來犯聲稱必竄常熟抄我後路營壘相接縱橫六七十里統領李
鶴章檄諸軍分道進攻樹軍由嵩山左路進十月初公率所部與賊相

值猛擊之賊隊大亂遂毀秀成營二十餘追至茅塘橋銘松盛三軍所
攻壘尚未下公與諸將議曰兵家要訣拊背扼吭若頓兵堅壁之下苦
攻折銳非計也今左路賊已擊退願率所部營中右二路聞使賊不得
相合十三日營成賊大驚各軍三面環攻之夜復暗繞賊後奪賊前營
敗賊後壘節節敗潰死者逾萬時蘇軍程學啟亦克潯關秀成奪氣援
賊皆退走李公督程學啟戈登諸軍急攻蘇州令其弟鶴章率諸軍急
攻無錫公與盛軍逼東北城而壘賊來撲會諸軍夾擊敗之諸軍營壘
皆定二十四日蘇城賊窮蹙乞降秀成乃率死黨入太湖構結常州賊
水陸分進以援無錫城賊死守傍運河城河周築土城各門均立四五
營護之時銘軍專擊外援公同諸軍分圍城賊十一月朔公兄弟激勵
將士攻破亭子橋前營賊驚懼次日公從兄先克東門土營四各軍皆
一鼓登城遂拔無錫李公以無錫一軍斷蘇常要路擊退援賊使攻取
蘇城之軍不被牽制功甚偉疏上公由總兵得

旨以提督記名簡放方是時議者以將士過勞宜稍休公與諸軍請於
李公曰賊勢甚窘而常州民不聊生宜急進蹙之以救民約銘軍並進
時守常賊酋陳坤書擁眾十餘萬誓與城存亡以爲金陵犄角官軍既

續碑傳卷六十七

二十

抵城下各奪賊十餘壘公與銘軍隔城東北隅一大賊壘乃併力克之
惟東門附濠兩石壘不下公怒自率隊進攻之適奔牛賊壘降銘軍奔
牛爲西路要區羣逆復爭守將被困公命部將會諸軍急援之圍解三
年二月賊十數萬冒雨越江陰犯常熟福山聲言直窺蘇滬以冀北解
常州之圍南緩嘉興之攻勢張甚公兄與劉銘傳等率隊回勦公方疾
留守賊夜犯皆擊走之三月公兄回營李公親抵常州環視城西及運
河左右賊壁如列星西北通丹陽西南通金壇眾十餘萬乃檄公與諸
將先攻外賊以斷其援援絕而附城石壘一潰一降遂合圍李公以不
速克城慮生他變令公於城東附濠數武外修築長牆蔽護諸軍移礮
進擊四月六日克常州時浙江巡撫曾公國荃攻金陵未幾亦克復李
秀成伏誅江南悉平是役也以公從兄與銘軍先抵常州城下又與開
軍踴躍先登奉

特旨賞給三代正一品封十月又奉

旨以廣西右江鎮總兵補授四年正月公統樹軍駐鎮江三月捻匪任
柱賴汶洸等竄運河東岸擾及海贛公奉檄赴淮徐勦捻四月僧忠親
王戰亡於曹州

上命大學士兩江總督曾公復爲欽差大臣督辦勦捻事宜而以李公
署兩江總督時親王新敗徐方震驚李公以公兄備兵徐海道檄公軍
佐之公內修軍政外佐其兄修團寨緝土匪徐境又安初金陵旣克楚
軍湘軍多散遣及曾公奉

命北征乃議用淮軍從以公所部爲親軍九月初捻逆由豫竄曹濟圖
犯運河公奉檄援山東賊回竄追擊於魚臺之谷亭樹軍勦捻戰事由
是始十月公由魚臺追賊一日已行六十里聞鼎軍被圍急往援與鼎
軍夾擊敗走之先是曾公鑿僧忠王追賊疲敝疏請於東豫江皖四省
要害設四重鎮江蘇則徐州山東則濟甯安徽則臨淮河南則陳州之
周家口均駐勁旅賊來則戰去則守爲以逸待勞之計顧逆捨奔突靡
定是年冬南竄豫鄂

廷旨屢飭追賊曾公乃檄銘軍爲游擊之師逐賊入鄂而以公軍移駐
周家口以扼回竄之賊時捻眾馬步數萬樹軍僅六營無騎兵曾公令
募馬步三營以助之豫中連年苦兵甚於苦賊公至日嚴部伍勤訓練
聯堡寨安居民豫人感之五年三月公兄奉

命爲直隸按察使公聞賊眾二萬將北趨急拔軍禦之於沙河乘賊不

續碑傳卷六十七

主

備橫斷其首尾賊眾踵至公分軍三路直衝橫擊賊不支乃竄趨周口
攻撲營壘時公弟樹屏以副將留守公回顧首尾夾勦賊大挫追奔至
淮甯北而還自是捻匪析爲二枝分竄齊豫皖境上均在沙河以東五
月聞賊欲合攻周口周口一鎮跨沙河東西爲兩寨夙稱繁富自曾公
設四鎮西路軍火糧餉全貯於此是時寨東賊氛甚劇公令各營嚴備
而自率精銳渡河進勦追殺十餘里賊夜遁越沙河而西時勦捻各軍
皆步多馬少疲於奔命劉銘傳因建修沙河之策冀蹙賊於沙河之
西不令東竄七月公率所部會諸軍築牆濬濠布置嚴整而豫軍所守
不慎賊乘釁東竄沙河之防因以無成公慮賊之過運河也以追勦請
曾公許之遂爲樹軍游擊之始八月曾公由濟甯抵周口旋疏請令李
駐徐州或清江主持東路軍事湖北巡撫曾公國荃駐南陽或德安主
持西路軍事九月公追賊至鄆陵聞賊圍許州遂晝夜兼程行一百三
十餘里忍飢苦戰乘夜進擊遂解許圍時豫撫議守賈魯河曾公檄公
率部回周口旋聞張總愚竄秦中任柱賴沈汶等合竄東境河防之議
又寢公自周口東發仍作游擊之師十月謁李公於徐州極陳馬賊飄
忽步隊鈍滯慷慨激發請增馬隊二三千誓滅此賊以餉絀未如所請

時銘軍追逐任柱等於魚臺金鄉之間李公與諸軍會勦之十一日擊賊於豐縣南敗之十二日追擊於豐西又敗之是夜乘勝急追賊方憩息不爲備斬獲千餘十三日追至豐北賊方攻寨聞官軍至急竄走公軍自是與銘軍日躡賊賊飢狂奔我軍亦迅進行塵相及日有禽斬二十五日賊由曹州竄定陶遂急馳抵定陶時已二更兩軍東西進擊二十六日黎明復追賊至曹縣殲斃不可勝計賴汶洸僅率數十騎南遁餘黨數百名棄械乞降是時羣賊將竄渡運河公與銘軍日行百里又往往夜戰使賊一日不息一寨未破賊是以不得渡運河而東十一月公旋軍周口時曾公奉

命回任江督李公督勦捻之師公拔隊追賊抵汝甯聞賊由光固竄鄂中十二月鄂將郭松林敗績於白口賊燄復張公自黃岡追至棗陽逆眾又竄擾黃德之間鄂撫曾公駐節德安檄援兵甚急或言賊悍且眾不可輕發有寓書阻公者公曰援師無中途需次理且湘淮兩軍休戚相關可徘徊瞻顧乎束書不顧率所部疾進至德安賊眾數萬公以游擊日久雖挫賊氛恨未撲滅見賊屯楊家河東岸綿五十餘里遂分部夾進衝撲過河賊死傷無數弁勇中見賊酋有騎白馬遁者識其爲任

續傳卷六十七

五

柱也指以告公公怒髮上指督隊迅追冀痛勦而生磔之不意賊眾分路回抄斷我軍公督親兵苦戰屢陷賊陣被圍垓心昏夜莫辨親兵二百餘人傷亡將盡公猶大呼衝突手刃數賊墜馬被害是夜大霧公部之爲賊斷者皆分據邨莊拒戰賊退德安圍解公軍獲全十二月二十二日也次日黎明得公屍三軍之士哭聲震野李公疏公死事且歷陳

公忠勳

天子震悼優卹敕本籍及立功之地均建專祠
賜諡勇烈節相曾公又疏稱其忠貞遺愛復奉
旨於陳州周家口建立專祠七年捻逆蕩平

天子追念前勳諭同忠親王僧格林沁副都統伊興額等各賜祭八月以李公復疏其忠

加贈太子少保銜公孝友忠義根於至性平居訥訥若無異於人遇危難則傾身赴援不少退避其始以親年衰遭世亂不忍違棄鄉里治團築寨身捍大敵迨親沒既葬乃佐其兄治軍江南一戰弗從意弗得也當蘇賊猖獗羣情震悚之秋往往義氣勃發奮臂爭先嘗以救拔諸軍出圍身受數創既克回營解衣就臥袖中乾血片片墜地當苦戰時負

痛而不自知也故雖一偏裨而忠勇之名聞於
九陛及統軍而北也亦知步卒四千不足制騎賊數萬而念
宵旰之憂勤中原之塗炭時以忠果血誠激勸所部追逐千里迭挫在
氛卒以身殉

王事生平淡於榮利遇大捷他將攘臂論功公則默無一語治軍秋毫
無犯士卒未食不先食未飲不先飲有疾者雖廝養必親診治曾公稱
其仁愛惻怛出於篤誠故人樂爲之用沒後所部守公遺法從平捻匪
凱撤後猶人人痛思公不置云公以道光丙戌年七月初八日生殉節
時年四十一公兄弟九人長樹聲今直隸按察使公居次妻吳氏繼妻
黃氏側室王氏長子雲達嗣子雲翔女一公功績忠節例得登於史官
公兄命宗誠狀公行因采諸章疏參以見聞稍加論次上之史館謹狀
同治九年夏

續碑傳集卷六十七

續碑傳集卷六十七

三

08759

